



08211

水心文集
十九卷補遺
一卷校注二卷嗣出

光緒壬午瑞安孫
氏據明正統本校
三刻置詔善祠塾

水心先生文集舊序

備眾文名一家言者在唐始著前不多見也先生之作從壯至老由今並古日邁月超神心窮天地偉刻動海嶽翼然如登明堂入清廟蔽冕崇麗金奏而玉應其光耀變化如驪龍翔而慶雲隨也盛矣哉其於文乎粹矣哉其於道乎蓋周典孔籍之與不傳左冊馬書之妙不續詩迄章張騷降景宋華與質始判正與奇始分道失其統緒久矣世遂以文爲可玩之物爭慕趨以騁馳以其力雕鏤以其巧彰施以其色暢達以其才無不自託於文而道益離矣豈能言易知言難歟或者反之則曰吾亦有道焉爾文奚爲哉夫子不云乎言之不文行之不遠六藝非萬世之文乎以詞爲經以藻爲緯文人之文也以事爲經以法爲緯史氏之文也以理爲經以言爲緯聖哲之文也本之聖哲而參之史先生之文也乃所謂大成也欲植傑木必豐其根欲滌巨澤必濬其源文其澤木也學其根源也學與文相爲無窮也是果專在筆墨間乎集起淳熙壬寅更三朝四十餘年中期運通塞人物散聚政化隆替策慮安危往往發之於文讀之者可以感慨矣故一用編年庶有考也昔歐陽公獨擅碑銘其於世道消長進退與其當時賢卿大夫功行以及閭巷山巖樸儒幽士隱晦未光者皆述焉輔史而行其意深矣此先生之志也門人大梁趙汝諧序

黎刻水心先生文集原序

昔宋盛時以文章名家有廬陵南豐眉山臨川數公者窮聖賢之奧究道德之微故其爲文足以繼漢唐之盛天下皆師尊之南渡以來作者猶衆葉水心先生其一也先生之學浩乎沛然蓋無所不窺而才氣之卓越又足以發之然先生之心思行道於當時而見之功業不但爲文而已也觀其議論謀猷本於民彝物則之常欲以正人心明天理至於求賢審官訓兵理財一切施諸政事之間可以隆國體濟時艱然未至於大用而道不盛行今之所見惟其文而已豈非可惜哉其論林栗一書有功於斯道甚大時栗唱道學之說欲竄逐文公善人君子皆惴懼先生獨上書天子論栗姦邪請加摧折以扶善類國家之本莫大於是先生正直剛明嚴於善惡之辨如此今去已遠而其言

水心文集序

二

存是亦可以不朽矣章貢黎諒字公允早得先生之文讀之固已起敬起慕然恨不得見其全及爲處州府推官乃先生鄉郡常行縣訪之士大夫得奏議記敘等作八百餘篇手自讎校分爲二十九卷錄梓以傳而屬直爲序於乎先生之文豈直所能知而亦豈待序而傳哉念今之仕者於其分所當爲上之人之所督責猶有不能盡其職而挂於吏議若非其所當急則怠廢可知矣公允於此文非其所急也而知之深好之篤勤敏足以有爲從容於政事之餘收輯而刊布之使前之諸公有以繼後之爲士者有所視法而興起尙賢與善之意厚矣是可嘉也故爲序而道之

景泰二年三月朔日榮祿大夫太子太保兼吏部尙書泰和王直書

黎刻水心先生文集原跋

余幼時先君東臯處士以遺書一帙名曰策場標準集授諒謂是書乃水心葉先生適在宋時所著也其忠君愛國之誠藹然溢於言意之表惜乎前後亡缺脫落有不可讀者嘗慕求全集竟不可得及余領鄉薦授官栝郡先生乃郡邑龍泉人也後徙居溫之瑞安嘗因公事詣邑訪求遺本無有存者間或得一二篇或數十篇歷八載始克備有曰文粹曰葉學士文集曰水心文集及余幼時所讀標準集者其總目有四惟標準一集十七其七八公暇躬自謄錄其各集中所作劄狀奏議記序詩銘并雜著成篇章者得八百餘篇編集彙次分爲二十九卷其所著經傳子史編爲後集總名曰水心先生文集繡梓以永其傳與四方同志共覽焉集中字義脫落無可考者不敢僭補姑虛以待後之君子而正之

水心文集跋

三

正德十三年戊辰歲孟春望日處州府推官章貢黎諒謹識

宋史本傳

葉適字正則温州永嘉人爲文藻思英發擢淳熙五年進士第二人授平江節度推官丁母憂改武昌軍節度判官少保史浩薦於朝召之不至改浙西提刑司幹辦公事士多從之游參知政事龔茂良復薦之召爲大學正遷博士因輪對奏曰人臣之義當爲陛下建明者一大事而已二陵之讎未報故疆之半未復而言者以爲當乘其機當待其時然機自我發何彼之乘時自我爲何彼之待非真難真不可也正以我自爲難自爲不可耳於是力屈氣索甘爲退伏者於此二十六年積今之所謂難者陰沮之所謂不可者默制之也蓋其難有四其不可有五置不共戴天之讎而廣兼愛之義自爲虛弱此國是之難一也國之所是旣然士大夫之論亦然爲奇謀祕畫者止於乘機待時

水心文集傳

四

忠義決策者止於親征遷都深沈遠慮者止於固本自治此議論之難二也環視諸臣迭進迭退其知此事本而可以反覆論議者誰乎抱此志意而可以策勵期望者誰乎此人才之難三也論者徒鑒五代之致亂而不思靖康之得禍今循守舊模而欲驅一世之人以報君仇則形勢乖阻誠無展足之地若順時增損則其所更張動搖關係至重此法度之難四也又有甚不可者兵以多而至於弱財以多而至於乏不信官而信吏不任人而任法不用賢能而用資格此五者舉天下以爲不可動豈非今之實患歟沿習牽制非一時矣講利害明虛實斷是非決廢置在陛下所爲耳讀未竟帝蹙額曰朕比苦目疾此志已泯誰克任此惟與卿言之耳及再讀帝慘然久之除太常博士兼實錄院檢討官嘗薦陳傅良等三十四人於丞相後皆召

用時稱得人會朱熹除兵部郎官未就職爲侍郎林栗所劾適上疏爭曰栗劾熹罪無一實者特發其私意而遂忘其欺矣至於其中謂之道學一語利害所係不獨熹蓋自昔小人殘害忠良率有指名或以爲好名或以爲立異或以爲植黨近創爲道學之目鄭丙倡之陳賈和之居要津者密相付授見士大夫有稍慕潔修者輒以道學之名歸之以爲善爲玷闕以好學爲已愆相與指目使不得進於是賢士惴慄中材解體銷聲滅影穢德垢行以避此名栗爲侍從無以達陛下之德意志慮而更襲用鄭丙陳賈密相付授之說以道學爲大罪文致語言逐去一熹自此善良受禍何所不有伏望摧折暴橫以扶善類疏入不報光宗嗣位由秘書郎出知蘄州入爲尙書左選郎官是時帝以疾不朝重華宮者七月事無鉅細皆廢不行適見上力

言父子親愛出於自然浮疑私畏似是而非豈有事實若因是而定省廢於上號令愆於下人情離阻其能久乎既而帝兩詣重華宮都人懽悅適復奏自今宜於過宮之日令宰執侍從先詣起居異時兩宮聖意有難言者白可因此傳致則責任有歸不可復使近習小人增損語言以生疑惑不報而事復浸異中外洵洵及孝宗不豫羣臣至號泣攀裾以請帝竟不往適責宰相留正曰上有疾明甚父子相見當俟疾瘳公不播告使臣下輕議君父可乎未幾孝宗崩光宗不能執喪軍士籍籍有語變且不測適又告正曰上疾而不執喪將何辭以謝天下今嘉王長若預建參決則疑謗釋矣宰執用其言同入奏立嘉王爲皇太子帝許之俄得御批有厯事歲久念欲退閑之語正懼而去人心愈搖知樞密院趙汝愚憂危不知所出適告知閣門

事蔡必勝曰國事至此子爲近臣庸坐視乎蔡許諾與宣贊舍人傅昌朝知內侍省關禮知閤門事韓侂胄三人定計侂胄太皇太后甥也會慈福宮提點張宗尹過侂胄侂胄覘其意以告必勝適得之卽亟白汝愚汝愚請必勝議事遂遣侂胄因張宗尹闕禮以內禪議奏太皇太后且請垂簾許之計遂定翊日禪祭太皇太后臨朝嘉王卽皇帝位親行祭禮百官班賀中外晏然凡表奏皆汝愚與適裁定臨期取以授儀曹郎人始知其預議焉遷國子司業汝愚旣相賞功將及適適曰國危効忠職也適何功之有而侂胄恃功以遷秩不滿望怨汝愚適以告汝愚曰侂胄所望不過節鉞宜與之汝愚不從適嘆曰禍自此始矣遂力求補外除太府卿總領淮東軍馬錢糧及汝愚貶衡陽而適亦爲御史胡紘所劾降兩官罷主管冲佑觀差知衢州

辭起爲湖南轉運判官遷知泉州召入對言於寧宗曰陛下初嗣大寶臣嘗申繹卷阿之義爲獻天啟聖明銷磨黨偏人才庶幾復合然治國以和爲體處事以平爲極臣欲人臣忘己體國息心旣往圖報方來可也帝嘉納之初韓侂胄用事患人不附一時小人在言路者創爲僞學之名舉海內知名士貶竄殆盡其後侂胄亦悔故適奏及之且薦樓鑰邱密黃度三人悉與郡自是禁網漸解矣除權兵部侍郎以父憂去服除召至時有勸侂胄立蓋世功以固位者侂胄然之將啟兵端適因奏曰甘弱而幸安者衰改弱而就彊者興陛下申命大臣先慮預美思報積恥規恢祖業蓋欲改弱以就彊矣竊謂必先審知彊弱之勢而定其論論定然後修賞政行實德弱可變而爲彊非有難也今欲改弱以就彊爲問罪驟興之舉此至大至重事也故

必備成而後動守定而後戰今或謂金已衰弱姑開先釁不懼後艱求宣和之所不能爲紹興之所不敢此至險至危事也且所謂實政者當經營瀕淮沿漢諸郡各爲處所牢實自守敵兵至則阻於堅城彼此策應而後進取之計可言至於四處御前大軍練之使足以制敵小大之臣試之使足以立事皆實政也所謂實德者當今賦稅雖重而國愈貧如和買折帛之類民間至有用田租一半以上輸納者況欲規恢宜有恩澤乞詔有司審度何名之賦害民最甚何等橫費裁節宜先減所入之額定所出之費既修實政於上又行實德於下此其所以能屢戰而不屈必勝而無敗也除權工部侍郎侂冑欲藉其草詔以動中外改權吏部侍郎兼直學士院以疾力辭兼職會詔諸將四路出師適又告侂冑宜先防江不聽未幾諸軍皆敗侂冑懼

以邱密爲江淮宣撫使除適寶謨閣待制知建康府兼沿江制置使適謂三國孫氏嘗以江北守江自南唐以來始失之建炎紹興未暇尋繹乃請於朝乞節制江北諸州及金兵大入一日有二騎舉旗若將渡者淮民倉皇爭斫舟纜覆溺者衆建康震動適謂人心一搖不可復制惟劫砦南人所長乃募市井悍少并帳下願行者得二百人使采石將徐緯統以往夜過半遇金人蔽茅葦中射之應弦而倒矢盡揮刀以前金人皆錯愕不進黎明知我軍寡來追則已在舟中矣復命石跋定山之人劫敵營得其俘馘以歸金解和州圍退屯瓜步城中始安又遣石斌賢渡宣化夏侯成等分道而往所向皆捷金自滁州遁去時羽檄旁午而適治事如平時軍須皆從官給民以不擾淮民渡江有舟次止有寺給錢餉米其來如歸兵退進寶文閣待制

兼江淮制置使措置屯田遂上堡塢之議初淮民被兵驚散日不自保適遂於墟落數十里內依山水險要爲堡塢使復業以守春夏散耕秋冬入堡凡四十七處又度沿江地創三大堡石跋則屏蔽采石定山則屏蔽靖安瓜步則屏蔽東陽下蜀西護溧陽東連儀真緩急應援首尾聯絡東西三百里南北三四十里每堡以二千家爲率教之習射無事則成以五百人一將有警則增募新兵及抽摘諸州禁軍二千人并堡塢內居民通爲四千五百人共相守戍而制司於每歲防秋別募死士千人以爲劫若焚糧之用因言堡塢之成有四利大要謂敵在北岸共長江之險而我有堡塢以爲聲援則敵不敢窺江而士氣自倍戰艦亦可以策勳和滁真六合等城或有退遁我以堡塢全力助其襲逐或邀其前或尾其後制勝必矣此所謂用力寡而收功博也三堡就流民漸歸而侂胄適誅中丞雷孝友劾適附侂胄用兵遂奪職自後奉祠者凡十三年至寶文閣學士通議大夫嘉定十六年卒年七十四贈光祿大夫謚忠定適志意慷慨雅以經濟自負方侂胄之欲開兵端也以適每有大讎未復之言重之而適自召還每奏疏必言當審而後發且力辭草詔第出師之時適能極力諫止曉以利害禍福則侂胄必不妄爲可免南北生靈之禍議者不能不爲之歎息焉

水心先生文集總目

奏劄一卷

狀表一卷

奏議三卷

詩三卷

記三卷

序一卷

墓銘一十三卷

行狀 謚議 銘 青詞 疏文 一卷

祭文一卷

書啟一卷

雜著一卷

水心文集總目

九



水心先生文集目錄

卷之一

奏劄

上孝宗皇帝劄子

上光宗皇帝劄子

上寧宗皇帝劄子

劄子二

劄子三

上寧宗皇帝劄子開禧二年

劄子二

劄子三

卷之二

狀表

水心文集目錄

妄集兩淮申省狀

定山瓜步石跋三堡塢狀

辭免華文閣待制提舉西京嵩山崇福宮狀

辭免除寶謨閣直學士提舉鳳翔府上清太平宮

狀

辯兵部郎官朱元晦狀

淮西論鐵錢五事狀

蘄州到任謝表

除淮西提舉謝表

除太府卿淮東總領謝表

謝除華文閣待制提舉西京嵩山崇福宮表

謝除寶謨閣直學士提舉鳳翔府上清太平宮表

湖南運判到任謝表

除秘閣修撰謝表

除工部侍郎謝表

除吏部侍郎謝表

除知建康到任謝表

代薛端明上遺表

除華文閣待制提舉西京嵩山崇福宮謝皇太子
牋

受玉寶賀表

受玉寶賀牋

申省乞致仕狀

再申省狀

卷之三

奏議

水心文集目錄

法度總論一

法度總論二

法度總論三

資格

銓選

薦舉

任子

科舉

學校

制科

宏詞

役法

新書

吏胥

監司

卷之四

奏議

始論一

始論二

取燕一

取燕二

取燕三

親征

待時

實謀

財總論一

水心文集目錄

財總論二

治勢

財計上

財計下 缺

外論一

外論二

外論三 缺

外論四 缺

卷之五

奏議

紀綱一

紀綱二

紀綱三

紀綱四

終論一

終論二

終論三

終論四

終論五

終論六

終論七

兵總論一

兵總論二

四屯駐兵

廂禁軍弓手土兵

卷之六

水心文集目錄

古詩

馮公嶺

吳江華嚴塔院贈了洪講師

送趙景明知江陵縣

送鄭景元

題賈儼不忘室

陳同甫抱膝齋二首

超然堂

再過吳江贈僧了洪

靈巖

葑門

還華賢良九經說賢良進卷語林等

齊雲樓

虎邱

北齋

題椿桂堂

贈訥相

送鄭虞任赴京西檢法官

張氏東園送王恭父得殿宇

奉賦德修西充大夫成都新園詠歸堂二首

送馮傅之

送李郭

送喻太丞知處州

送劉德修

題李君亮義概堂

醫工歎重贈柳山人

水心文集目錄

宿石門

月谷

禱雨題張王廟

寄黃文叔謝送真日鑄

送黃竑

淨光松風閣

送蔡夢得

和答錢廣文蘭松有剛折之歎

趙振文傳借琉璃燈鋪寫山水人物一燭發明百

巧呈露畫師精妙者不能過也

和答徐斯遠兼簡趙昌甫韓仲止

徐仁父先大夫詩卷指其改補鍋八句曰願有請

因疏下方

題孫季蕃詩

石經春秋一代奇寶王氏爲熙豐學廢不用瑞安
沈彬老蠟而有之後世孫體仁閣以度焉余爲名
曰深明

贈二葛友

呂子陽辭蘭谷家園卻就石泉精舍

永嘉端午行

題掃心圖

後端午行

贈朱承務

尼童何了說從道一長老六年一忽捨去莫知所
之或云在天目山也說甚喜將薙落從之可少助
乎

水心文集目錄

六

著存亭

寄題運使方公祠堂

鄱陽董季興往遊懷玉山捐田入寺爲民禱雨君
旣道其本末又示山中五章請余賦之然比來霖
潦淹月種爛乃未秧也方幸數日晴霽爾

改東門出二首

中塘梅林天下之盛也聊伸鄙述啟好游者

王氏讀書堂

王簡卿侍郎以詩贈王孟同王成叟之姪也輒亦
繼作

余頃爲中塘梅林詩他日來游復作

送葛元誠

送白鄂還蜀

朱娘曲

翁誠之挽詞

送曹器遠

送丁子植

送方書記兼簡府主

偉叔蔡兄來永嘉屢辱投贈於其歸也輒奉俚歌

爲謝兼敘離索

送戴料院

幽賞

梁父吟 并序

剡谿舟中

新移瑞香舊曾作文忘之因今追憶云

送薛子長

水心文集目錄

七

送陳彥羣

題人扇

與英上人游紫霄觀戲述短歌

白紵詞

王木叔秘監挽詞

月波樓

送陳子雲通判

賦董季興玩書巖
送劉晉卿

卷之七

古詩

送林孔英

贈巖電隱士

送謝學賓

何倫秀才親喪不能舉奠其親戚故人有知之者
蜂兒樞歌

趙子容任温州司法終日看冊子而事自理又新
廩儲糧功利可傳也爲賦讀書行率諸友同作
登北務後江亭贈郭希呂

送程傳叟

送徐景大

題五畏齋

懷遠堂

報德菴

露星亭

送高仲發

明覺寺

水心文集目錄

送蔣少韓

寄題鍾秀才詠歸堂

鹿鳴宴詩

潘廣度

送楊通判

哀輦仲至

送王通判

贈林秀才

送徐洞清秀才入道

自羅浮行田宿華嚴寺

送鞏仲同

送林退思四川分司茶馬幹官

送周明叔王成叟併上昌甫仲止二兄

陳伯明建讀書堂於仙都巖蓋縉雲最勝特處市
書名田役大費巨當用眾力一家不能專也余爲
作仙都行以堅其成

送龔叔虎

贈趙季清縣丞

趙成父築亭上饒卽用東里舊圃榜曰魚計

孔復君架樓貯書疏池累石花藥環列

送蔡子重

許敬子用余言作松山草堂然游山之意猶未已
也申以爲箴

送蔡子壽

寄柳秘校

魏華甫鶴山書院

水心文集目錄

寄李季章參政

送陳壽老

題鄭大惠詩卷

送孫倬夫

端午思遠樓小集

孔鍊士話龍虎山之勝於其行因以送之

會昌觀小集呈坐上諸文友

送胡衍道

送呂子陽自永康攜所解老子訪余留未久其家
報以細民艱食急歸發廩賑之

送葉任道教授之官靜江

送趙季清兼謝所惠詩

送陳漫翁

送戴漢老

孫祖佑解元世友堂

丁氏東嶼書房

端午行

虎長老修雙峯

毛希元隱居廬山臥龍瀑

趙振文在城北廂兩月無日不遊馬塍作歌美之

請知振文者同賦

周純臣子去病淑慧而短折賦以哀之

送盧簡夫

贈祈雨妙閣黎

寄題朝宗新樓

和汪提刑祈雨

水心文集目錄

蔡尙書挽詞二首

題處州翔峯閣

讀王德甫文卷因送省試

王宗卿答春堂

送葉路分

答李制置

林叔和見訪道舊感歎因以爲贈

上灘

五言律詩

高宗皇帝挽詞二首

孝宗皇帝挽詞二首

吉州刺史蔡直之挽詞二首

陽復

送鄭丈赴建寧五首

哭鄭丈四首

何參政挽歌

送陳糧科

題費肅校書遺事

送鄧諫從制幹

題柳山人壁二首

致政通直錢公挽歌詞

亡友項子謙兄挽歌詞

待制中書舍人陳公之亡以山宅須利旣遷殯而未葬也後五月乃克葬焉二首

西山

看柑

水心文集目錄

贈杜幼高

待制湯公挽詞

吳參議挽歌詞

沖佑大夫鮑公挽詞

雪後思遠樓曉望

宿覺菴

贈勝上人

朱文昭母楊氏挽詞

沖佑安撫郎中張公挽詞

縣尉林公挽詞

陳侍郎挽詞

太令人胡氏挽詞

題張提舉園

送謝希孟

送周子靜

林處士挽詞

錢知縣挽詞

送潘景參

贈徐靈淵

戴肖望挽詞

徐靈淵挽詞

包顛叟挽詞二首

林敬之挽詞

王運使挽詞

薛子舒罷官久無所授端明得謝始換承務郎

贈呂縣丞

水心文集目錄

詹魯山解元以壽母求詩

贈蔡茂材貫之子與

余知府挽詩二首

趙知縣挽詞

趙清叔挽詞

贈聽聲歐陽承務

送包通判兼寄滕季度

趙尙書挽詩

周宗夷東山堂

邱安人挽詩

題郭希呂劉詠道游鴈蕩詩後

送戴宣子

題仰孝廉事實後

贈盧次夔

送趙幾道邵武司戶

常德郎中林公挽詞

贈鄭秀才

贈李秀才順之

送侯居父

贈高竹有外姪

贈夏肯甫

趙知府母齊安郡太夫人挽詩

沈氏書堂

薛子舒墓

項君先有幽興堂其子木卽以名菴

施翔父掌教長沙

水心文集目錄

送劉幾道惠安尉

送陳約甫知永豐

王祕監令人挽詩

奉送周知錄木叔祕監其舅也

葉路分居思堂

王通判挽詩

林簽判挽詩

送張知錄

卷之八

七言律詩

送鄭景望二首

曾晦之挽詞

次韻喻叔奇九日

中洲處士折梅花并新語爲贈率易鄙句爲謝

送劉德修時在京口

送范文叔知彭州

送潘德久

樓參政挽詞

無相寺道中

趙路分挽詞

陳益謙挽詞

寄呂巽伯換酒亭

併工

菊花開送徐靈淵

次韻韓仲止

齊國太夫人挽詞

水心文集目錄

安撫待制侍郎徐公挽詞二首

許相公挽詞二首

送丁子齊主簿

丁少明挽詞

宋仲方游吳袖文索詩爲別

毛密夫挽詞

直院中書莫公俎往哀痛不能成文輒留小詩靈

几并致鱸魚金柑爲奠

薛君季常挽詞

題彭澤縣尉廳林壑之勝

送趙提幹

賀縣尉

送曹潛夫

謝李參政因送曹瀘州寄簡

贈李秀才肖舒

郭伯山挽詞

題王叔範自耕園

福國太夫人陳氏挽詞

送郭黃中

劉孺人挽詩

張提舉挽詩

薛端明挽詩二首

送林子高

塔頭林君挽詩

題劉潛夫詩什併以將行

送宋知錄

水心文集目錄

和王宗卿白兔詩

李處士挽詞

衢州雜興二首

七言絕句

題閭才元喜雪堂三首

除夜元日連登煙霏樓

元夕立春喜晴於是郡人久不出矣

岷江愁二首挽陳持中知府郎中嫂蒸人

劉高士自畫琴橫膝前對雲起求詩

水心卽事六首兼謝吳民表宣義

詩悼路鈴舍人德久潘公

柯君振相別三十餘年爲言親喪不能舉請賦此

詩庶幾有哀之者

橘枝詞三首記永嘉風土

贈口道人

過葉威仲不值

余泛舟不能具舫創爲隆蓬加牖戶焉

鋤荒

送朱相士朱文昭族孫云得劉碧雲相法

潛經閣

題施紙被蔡宣義所藏孫太守褒諭帖

劉氏女自誓爲尼憐其操者幸助成之

送蔡學正

奉酬般若長老

營師常秉燭爲人說氣色戲成此絕

衆議留李師煉丹旣而不果

水心文集目錄

夫

下仙看梅

對讀文選杜詩成四絕句

題學海樓

張總幹挽詩

翁常之挽詞

陳待制挽詩

送鮑賓甫

請惟耿住水陸院

讀葉子元詩題其後

送別李毅高宣教

送黃巖二陳秀才

建會昌橋

蔡良甫觀頤堂

章仙姑

小句送陳粹甫知錄

送孫子淵潭州司理

郭宰爲鄭全真歿買田以贍其後

贈通川詩僧肇書記

贈瑞鹿瑩老化緣鑄鐘

寄題葉路分與君樓如今若肯從徵召總把三峯

乞與君大宗賜陳希夷詩也

寄題駱子高解元蝸室

薛嚴州挽詞

送胡彥思

贈孫十五道人

送王宗卿

水心文集目錄

題方武成詩卷

送惠縣丞歸陽羨

送呂子陽二絕

徐師屋廣行家集定價三百

薛景石兄弟問詩於徐道暉請使行質以子錢界

之

渡浙江

游衢州府園

再過雲菴

次王道夫舟中韻三首

因在秀州寄王道夫詩三首

卷之九

記

白石淨慧院經藏記

江陵府修城記

漢陽軍新修學記

覺齋記

煙霏樓記

李氏中洲記

司馬溫公祠堂記

六安縣新學記

績溪縣新開塘記

樂清縣學三賢祠堂記

醉樂亭記

金壇縣重建學記

沈氏萱竹堂記

水心文集目錄

石洞書院記

時齋記

温州開元寺千佛閣記

宿覺菴記

卷之十

記

龜山楊先生祠堂記

平陽縣代納坊場錢記

瑞安縣重建廳事記

敬亭後記

留耕堂記

上蔡先生祠堂記

同安縣學朱先生祠堂記

晉元帝廟記

瑞安縣重修縣學記

利涉橋記

台州重建中津橋記

北村記

信州教授廳記

平江縣王文正公祠堂記

葉嶺書房記

風雩堂記

温州新修學記

漳浦縣聖祖殿記

紹興府新置二莊記

東嘉開河記

卷之十一

水心文集目錄

記

郭氏種德菴記

信州重修學記

長溪修學記

温州社稷記

季子廟記

宋吏部侍郎鄒公墓亭記

永嘉縣社稷記

南安軍三先生祠堂記

台州州學三老先生祠堂記

寶婺觀記

宜興縣修學記

潼川府修城記

連州開楞伽峽記

茶陵軍滅苗置寨記

櫟齋藏書記

湖州勝賞樓記

卷之十二

序

送劉茂實序

石菴藏書目序

東溪先生集序

沈子壽文集序

陰陽精義序

粹裘集序

水心文集目錄

龍川集序

紀年備遺序

丁少詹文集序

巽巖集序

平陽會書序

黃子耕文集序

周會卿詩序

觀潮閣詩序

謝景思集序

覆瓿集序

徐斯遠文集序

松廬集序

黃文叔詩說序

歸愚翁文集序

送戴許蔡仍王汶序

送林子柄序

周南仲文集後序

黃文叔周禮序

王木叔詩序

徐德操春秋解序

法明寺教藏序

宗記序

胡尙書奏議序

觀文殿學士知樞密院事陳公文集序

羅袁州文集序

送盧日新序

水心文集目錄

播芳集序

與平陽林升卿謀葬父序

卷之十三

墓誌銘

陳少南墓誌銘

葉君墓誌銘

墓林處士誌銘

宋故孟夫人墓誌銘

宋故宣毅郎通判平江府姚君墓誌銘

將仕郎嵇君墓記

宋杜君墓誌銘

媛女瘞銘

陳君墓誌銘

故朝散大夫主管建寧府武夷山沖佑觀周先生墓誌銘

故太碩人臧氏墓誌銘

葉君墓誌銘

厲君墓誌銘

翰林醫痊王君墓誌銘

郭府君墓誌銘

郭處士墓誌銘

卷之十四

墓誌銘

安人張氏墓誌銘

高夫人墓誌銘

徐德操墓誌銘

水心文集目錄

忠翊郎致仕蔡君墓誌銘

忠翊郎武學博士蔡君墓誌銘

陳彥羣墓誌銘

姜安禮墓誌銘

楊夫人墓誌銘

丁君墓誌銘

張令人墓誌銘

參議朝奉大夫朱公墓誌銘

呂君墓誌銘

丁少詹墓誌銘

姚君俞墓誌銘

卷之十五

墓誌銘

鄭仲酉墓誌銘

彭子復墓誌銘

宋武翼郎新製造御前軍器所監造官邵君墓誌銘

沈元誠墓誌銘

奉議郎鄭公墓誌銘

宋鄒卿墓誌銘

承事郎致仕黃君墓誌銘

朝奉大夫致仕黃公墓誌銘

司農卿湖廣總領詹公墓誌銘

林伯和墓誌銘

翁誠之墓誌銘

夫人薛氏墓誌銘

水心文集目錄

致政朝請郎葉公壙誌

高永州墓誌銘

卷之十六

墓誌銘

朝散大夫主管冲佑觀鮑公墓誌銘

莊夫人墓誌銘

寶謨閣待制中書舍人陳公墓誌銘

著作正字二劉公墓誌銘

朝請大夫司農少卿高公墓誌銘

夫人林氏墓誌銘

孫永叔墓誌銘

林正仲墓誌銘

夫人徐氏墓誌銘

提刑檢詳王公墓誌銘

卷之十七

墓誌銘

蔡知閣墓誌銘

徐道暉墓誌銘

運使直閣郎中王公墓誌銘

陳叔向墓誌銘

黃子耕墓誌銘

台州教授高君墓誌銘

戴夫人墓誌銘

劉子怡墓誌銘

劉夫人墓誌銘

沈仲一墓誌銘

水心文集目錄

胡崇禮墓誌銘

卷之十八

墓誌銘

校書郎王公夷仲墓誌銘

華文閣待制知廬州錢公墓誌銘

陳秀伯墓誌銘

著作佐郎錢君墓誌銘

劉建翁墓誌銘

朝議大夫知處州蔣公墓誌銘

高令入墓誌銘

葉君宗儒墓誌銘

李仲舉墓誌銘

朝請大夫主管沖佑觀煥章侍郎陳公墓誌銘

卷之十九

墓誌銘

太府少卿福建運判直寶謨閣李公墓誌銘

中奉大夫太常少卿直秘閣致仕薛公墓誌銘

國子監主簿周公墓誌銘

建康府教授惠君墓誌銘

朝奉郎致仕俞公墓誌銘

中奉大夫直龍圖閣司農卿林公墓誌銘

草廬先生墓誌銘

袁聲史墓誌銘

京西運判方公神道碑

卷之二十

墓誌銘

水心文集目錄

五

文林郎前秘書省正字周君南仲墓誌銘

寶謨閣直學士贈光祿大夫劉公墓誌銘

故吏部侍郎劉公墓誌銘

邵子文墓誌銘

虞夫人墓誌銘

故禮部尙書龍圖閣學士黃公墓誌銘

太學博士王君墓誌銘

卷之二十一

墓誌銘

朝請大夫直龍圖閣致仕沈公墓誌銘

宜人鄭氏墓誌銘

寶謨閣待制知隆興府徐公墓誌銘

中奉大夫尙書工部侍郎曾公墓誌銘

毛積夫墓誌銘

徐文淵墓誌銘

故通直郎清流知縣何君墓誌銘

夫人陳氏墓誌銘

劉靖君墓誌銘

鄭景元墓誌銘

東塘處士墓誌銘

中大夫直敷文閣兩浙運副趙公墓誌銘

卷之二十二

墓誌銘

厲領衛墓誌銘

趙孺人墓銘

故知廣州敷文閣待制薛公墓誌銘

水心文集目錄

故朝奉大夫知峽州宋公墓誌銘

故運副龍圖侍郎孟公墓誌銘

太孺人唐氏墓誌銘

故大宗丞兼權度支郎官高公墓誌銘

舒彥升墓誌銘

鞏仲至墓誌銘

史進翁墓誌銘

林德秀墓誌銘

卷之二十三

墓誌銘

宣教郎夏君墓誌銘

兵部尚書蔡公墓誌銘

福建運使直顯謨閣少卿趙公墓誌銘

故寶謨閣待制知平江府趙公墓銘

孺人周氏墓誌銘

故大理正知袁州羅公墓誌銘

夫人錢氏墓誌銘

朝議大夫祕書少監王公墓誌銘

郭伯山墓誌銘

竹洲戴君墓誌銘

包顯叟墓記

資政殿學士參政樞密楊公墓誌銘

卷之二十四

墓誌銘

夫人王氏墓誌銘

滕季度墓誌銘

水心文集目錄

國子祭酒贈寶謨閣待制李公墓誌銘

周鎮伯墓誌銘

兵部尚書徵猷閣學士趙公墓誌銘

長潭王氏墓誌銘

故樞密參政汪公墓誌銘

陳同甫王道甫墓誌銘

卷之二十五

墓誌銘

宋廋父墓誌銘

朝奉大夫知惠州姜公墓誌銘

陳處士姚夫人墓誌銘

孟達甫墓誌銘

黃觀復墓誌銘

修職郎監和劑局吳君墓誌銘

戴佛墓誌銘

趙孺人墓誌銘

朝請大夫提舉江州太平興國宮陳公墓誌銘

陳民表墓誌銘

宋葛君墓誌銘

毛夫人墓表

母杜氏墓誌銘

卷之二十六

行狀

故昭慶軍承宣使知大宗正事贈開府儀同三司

崇國趙公行狀

通直郎致仕總幹黃公行狀

水心文集目錄

天

宋故中散大夫提舉武夷山沖佑觀張公行狀

諡議

故昭慶軍承宣使知大宗正事贈開府儀同三司

崇國趙公諡宣簡議

故贈右諫議大夫龔公諡節肅議

黃端明諡簡肅議

李丞相綱諡忠定議

銘

母自欺室銘

存齋銘

陸山堂銘

省齋銘

師立齋銘

陳德中老勤堂銘

松阡雙蓮銘

鐘銘

青詞

代宋彥遠青詞

同前

同前

代子設醮青詞

大祥設醮青詞

謝恩青詞

疏文

代子水陸疏文

修海神廟疏文

水心文集目錄

建臥龍潭疏文

修路疏

修甘泉井

蘄州謁先聖父

祭諸廟文

祈晴文

祈雪文

謝雪文

總司祭先聖文

諸廟文

祠山禱雨文

祠山謝雨文

送龍水還潭文

卷之二十七

書

與趙丞相書

上西府書

寄王正言書

與黃巖林元秀書

與呂丈書

戴少望書

答少詹書

代人上書

答劉子至書

答吳明輔書

上執政薦士書

水心文集目錄

奏薦滕賢良

啟

賀葉丞相

賀龔參政

謝宰執登科

上趙運使

上芮提刑

上張安撫

上韓提刑

上陳提舉

上李簽院啟

與交代啟

祭文

祭鄭景望龍圖文

祭呂太史文

祭石似之文

祭高知錄文

祭趙知宗文

祭韓子師尚書文

祭潘叔度文

祭妻母翁安人文

祭中洲處士李公文

祭鄭景元文

祭魏益之文

祭林伯和文

水心文集目錄

祭翁常之文

祭高永州文

祭陳同甫文

祭史太師文

祭陳君舉中書文

祭徐子宜侍郎文

祭趙幾道文

祭邱樞使文

祭令人文

祭厲約父文

祭劉公實侍郎文

祭周南仲文

祭黃尚書文

祭俞侍郎文

祭王君玉太博文

祭虞夫人文

祭徐靈淵文

祭戴詹事文

祭徐文子侍郎文

祭陳殿撰文

祭朱文昭文

祭周宗夷文

祭徐叔範文

祭陳益之待制文

祭林叔和文

祭王木叔秘監文

水心文集目錄

祭蔡行之尙書文

祭薛子舒文

祭何知院文

祭黃觀復文

祭宋廋父文

祭薛端明文

代祭梁夫人文

祭李參政文

祭劉約甫文

祭劉口學文

祭林大卿淑人文

祭林宜人文

祭內子令人文

代子祭令人文

祭子三郎文

卷之二十九

雜著

書常希古長洲政事錄後

題潘彥庶羣書辨正

題謝道士混元皇帝實錄後

題薛常州論語小學後

進故事

胡壑名說

守禦錄

題桑世昌蘭亭博議後

題畫婆須密女

水心文集目錄

答高宗丞

題歐公書梅聖俞河豚詩後

題荆公詩後

題石月硯屏後

書龍川集後

題陳秀伯碑陰

趙汝駟爲台州屬縣簿建屋以藏戶版余爲名曰

孔先而著其詞

題二劉文集後

題張君所注佛書

題陳中書孝廟聖政序豪

題朱晦菴帖

題陳止齋帖

題張都官送行詩後

題張溟雲谷雜記後

題蔡君進書後

題韓尙書帖

題端信師帖

呂子陽老子支離說

和李參政

題周子實所錄

王夫人畫象贊

題林秀才文集

題張聲之友于叢居記

温州州學會拜

題拙齋詩橐

水心文集目錄

題唐誥書

題陳壽老論孟紀蒙

贈薛子長

錢則甫字說

題王少卿家範

陳漫翁祭器述

題陳壽老文集後

題錢夫人碑陰

陳子淵等字說

題劉潛夫南嶽詩橐

題周簡之文集

題永豐趙直閣廟節義錄

跋劉克遜詩

題姚令威西溪集

題潘刑曹郎帖

題沈朝議得何清源帖

題掃心圖

題薛仁靜墓

題黃巖蔡沖之墓誌後

跋義役

題瑞安宰董煇出蘇黃二帖後

水心文集目錄

三

水心先生文集卷之一

奏劄

上孝宗皇帝劄子

臣竊以今日人臣之義所當爲陛下建明者一大事而已
二陵之讎未報故疆之半未復此一大事者天下之公憤
臣子之深責也或不知所言或言而不盡皆非人臣之義
也虜弁兼强大而難攻故言者皆曰當乘其機積久堅固
而不可動故言者又曰當待其時夫究極本末審定計慮
而識所施爲之後先然後知機自我發非彼之乘時自我
爲何彼之待今日之率易苟且習聞卑論而無復振起之
實意則固以爲必當乘機必當待時以緩歲月而誤大事
是必然矣且虜知其不可以羈制中原久矣黏罕之立僞
楚僞齊撻懶之還五路河南今酋之初又議割白溝以南

水心文集卷之一

一

而定盟好蓋其本謀未嘗欲於河東河北之外越而有之
也顏亮雖威脅天下而北方起事以歸命者固已係踵我
之偏師雖浪戰無律亦能擣陝虢搖關輔得其要郡而守
矣然則虜之所謂難攻者豈真難而不可動者豈真不可
哉此姑未論可也方今之虛正以我自有所謂難我自
有所謂不可耳夫我自有所謂難而不知變其難以從其易
我自有所謂不可而不知變其不可以從其可於是力屈
氣索甘爲退伏常願和好抽兵反戍拱手奉虜而暫安於
東南臣以爲此今日之大患所當先論者也陛下感念家
禍始初嗣位葺兩淮理荆襄慰綏蜀道安集歸正人立忠
毅忠銳等軍教民兵弩手新城壁造器械講馬政糴米儲
貨處處椿積臣誠愚陋竊計陛下志望廣遠中夜太息何
止一事哉然而二十六年於此終未能奮發明詔有所舉

動者積今之所謂難者陰沮之積今之所謂不可者默制之而然也蓋其難有四其不可有五臣請得爲陛下條陳之夫重誓約畏先事以金幣啗虜本景德以來立國之素規耳旣隳於契丹復成於女真以至於浮海再三而謀夾攻費數百萬以買空燕則又宣和之新畫也故幹離不之始至也不過責納張覺紛亂元約而已黏罕復至又不過責悔割三鎮及間結余覩而已青城之辱忍復陳之則又不過以爲當如誓書而已是三役者可謂覆滅天常神理不容之巨罪也然虜自以彼直我曲用兵有名而國家遂爲之包容垢恥恬受奇禍竄逐議臣降詔謝過建炎未和則祈請不絕紹興旣和則絀損不較冊命行於至尊陪隸施於宰輔賴陛下威靈遠暢始得以匹敵往來耳置不戴之讐而廣兼愛之義自爲虜弱旣已久矣陛下欲尙加回

護陰俟他隙則憤怒未昭固不足以激使受命之士若流涕行誅顯示決絕而國信所藏典故具在亦恐天下之大義未足以易有司之常守此則國是之難一也國之所是旣然矣而士大夫之論何獨不然故不以賊虜爲可怒而反咎平燕之不當不責主和之致寇而反罪守京之非策棄三鎮則同議者皆是割大河則簽書者不疑至於秦檜遂行其南自南北自北之論湯思退從而效之撤守棄地開門納敵幾危於隆興之初王之望尹穡翁然附和更爲務實黜虛破壞朋黨趨赴事功之說相承至今況守已撤矣地已棄矣和親成矣尙何實之可務何事功之可赴哉雖然此猶小人之論耳至若爲奇謀祕畫者則止於乘機待時忠義決策者則止於親征遷都沈深慮遠者則止於固本自治高談者遠述性命而以功業爲可畧精論者妄

推天意而以夷夏爲無辨小人之論如彼君子之論如此陛下欲詢衆謀則流言成市互爲廢興若斷以獨志則慮之不盡事難輕發如此則議論之難二也女真方之前世非勁虜也然而童貫逃師於始至种師道玩寇於被圍李綱失守於太原李回掃迹於河上黃潛善不知南渡杜充未戰迎降趙鼎持重迄無定算張浚經略屢致奔潰此皆國家受付託委心腹之大臣也賢佞雖異敗事豈殊陛下遍覽往策當艱難鼎峙之時豈無傑材異稟克就勳績者乎今環視諸臣前者後者迭進迭退其知此事本而可以反覆論議者誰乎其抱此志意而可以策厲期望者誰乎以奔趨官簿爲閥閱以勾校朱墨爲詳練能縛一姦民遂自許爲有智能斬一黥卒遽自負爲有勇其懷利尙同毀傷善類陰塞正路謀以力據要津者充滿內外陛下欲倚

賴此徒責驥足於蹇步固無可言若出意收拾拔於度外則又孟浪欺謾無足憑仗此則人材之難三也國家規模特異前代本緣唐季陵夷藩方擅命其極爲五代廢立士卒斷制之禍是以收攬天下之權銖分以上悉總於朝上獨專操制之勞而下獲享其富貴之逸故內治柔和無狡悍思亂之民不煩寸兵尺鐵可以安枕無事此其得也然外網疎漏有驕橫不臣之虜雖聚重兵勇將而無一捷之用卒不免屈意損威以就和好此其失也論者方徧樂安靖以爲寧有外虞而無使內變課其功效固已過於漢唐遠矣且靖康之事未聞我有一城一邑敢爲叛命而坐視胡虜長驅深入惕息待死屠戮之慘與五代何異則得失之算豈不明哉夫徒鑒五代之致亂而不思靖康之得禍故李綱請裂河南爲藩鎮范宗尹嘗割邊而爲鎮撫皆隨

以廢格陛下循守舊模而欲驅一世之人以報君仇則形勢乖阻誠無展力之地若順時增損則其所更張其所動搖關係至重豈得易言此則法度之難四也雖然四難者特其精華景象而已計其事實又有甚不可者焉古者以民爲兵不以兵爲民因事以養兵不養兵以待事兵聚則求戰不聚則不敢戰今食錢自日一百以上家小口累仰給於官國力不供而常有饑寒之邑是以兵爲民也北方無事二十餘年終不解甲是養兵以待事也養兵如故和親亦如故是聚兵而不敢戰也合營屯廂禁見卒至六十萬羣校貴將廩祿無筭外虛州縣內困朝廷蓋兵以多而遂至於弱矣此舉天下以爲不可動者一也昔固有以乏財爲患矣未有皇皇汲汲取之無度如今日之甚者也自漕司造船督府犒軍而酒價十倍和買折帛行而民有

二賦免役錢起供而役法弊鹽袋錢增添而鹽筴盡頭子勘合免丁牙契無不增錢而州縣之間益以苛碎大抵經總制錢爲州之害月椿板帳爲縣之害而四蜀折估青草水腳對減激賞隔槽名色其患苦又爲特甚天下之錢歲入於官者八千萬緡而支費常不足蓋財以多而遂至於乏矣此舉天下以爲不可動者二也夫誅討仇賊修立大事使不愆紊是人主宰相之任也整挈綱目振舉小治使不失時是百官羣有司之任也未有以百官羣有司之任付之吏胥而能治者今自檢正都司六部列屬以及寺監皆綱目之所在也受成吏手能否莫辨賄賂公行關節交市民冤不直事滯不決小治若此况大事乎蓋不信官而信吏使之然耳此舉天下以爲不可動者三也夫以官聽吏疲吏之名人情之所避也然而不免焉何也國家以法

爲本以例爲要其官雖貴也其人雖賢也然而非法無法也非例無行也驟而問之不若吏之素也蹙而居之不若吏之久也知其一不知其二不若吏之悉也故不得不舉而歸之吏官舉而歸之吏則朝廷之綱目其在吏也何疑夫先人而後法則人用先法而後人則人廢不任人而任法則官失職而吏得志矣此舉天下以爲不可動者四也法雖用矣人雖廢矣然人材之定品孰堪爲某官孰不堪爲某官孰宜爲小孰宜爲大其可用之實猶在也今也任職則以人爲可廢擇官則爲人之餌學科舉挂名蔭計級而取循塗而進無不可爲者何賢何不肖何君子何小人之有哉廉恥日缺名實日喪風俗大壞而不可救蓋不任人而任法之弊遂至於不用賢能用資格耳此舉天下以爲不可動者五也是之謂不特四者精華景象之難變

而五者事實之尤不可動者也夫國是難變議論難變人才難變法度難變加以兵多而弱不可動財多而乏不可動不信官而信吏不可動不任人而任法不可動不用賢能而用資格不可動故期之以功名而志愈惰激之以氣節而俗愈媮右列未能登進勇爵而儒生或以見薄爲愧信臣未足承接密旨而外廷或以見疎爲疑公卿大夫私竊告語咸以今之事勢舉無可爲者姑以美衣甘食老身長子自足而已豈非今之實患深害一大事之殘賊者歟沿習牽制非一時矣其利害當講其虛實當明其是非當斷其廢置當決不講不明不斷不決陛下之志雖欲有爲將何所恃而獨行哉一世之人維繫手足塗塞耳目失正性矣豈知君仇之當報而爲陛下盡死力哉臣故曰二十六年於此終未能奮發明詔有所舉動者積今之所謂難

者陰沮之積今之所謂不可者默制之而然也然則其難者豈真難乎其不可者豈真不可乎蓋自古人君有雖居天下之尊位而不得制天下之利勢以卒於無成者矣陛下則不然以陛下之聖之武之勤之明博學遠覽絕識獨睿漢之宣帝允武唐之太宗皆不及也講利害明虛實斷是非決廢置在陛下所爲耳大義旣立則國是之難者先變矣陛下之國是變則士大夫議論之難亦變矣羣臣之在內者進而問之在外者舉而問之其任是事者親用之其不任是事者斥遠之則人材之難亦變矣變國是變議論變人材所以舉大事也其所當順時而增損者某事耳非輕動搖而妄更易也則法度之難亦變矣四難旣變則兵以多而弱者可使少之而後強也財以多而乏者可使少之而後裕也然後使官與吏相制而不制於吏使人與法相參而不役於法使賢能與資格並行而不屈於資格皆無不可動之患矣期年必變三年必立五年必成二陵之讎必報故疆之半必復不越此矣臣故以爲機自我發而非彼之乘時自我爲而何彼之待者也若置而不論因而不改則我之所謂難者真難矣虜豈復有易攻之機我之所謂不可者真不可矣虜豈復有可動之時亶之廢亮之殞幹魯之叛皆彼之機也我何乘焉彼之時也我何待焉臣故以爲率易苟且習聞卑論緩歲月而誤大事者也臣晝誦夜思審觀天意稽考人事十五年矣今日始得對清光發緒論陛下加聽之願反覆詰難以究其始末非獨臣之幸天地祖宗之靈所以望於陛下也

上先宗皇帝劄子

臣恭惟陛下始初臨御思深慮遠曾未浹旬遽詔中外之

臣各以其言疏列來上誠欲治之主正本始之先務也臣不敢汎濫條奏苟應故常惟陛下少留聽焉臣聞古之號爲賢君者必能先明所以治其國之意能先明所以治其國之意知病所在鏖剔根柢不憚改爲則雖已衰復興垂敗復成終必得其所願而後已不能先明所以治其國之意因循姑息隨目前之苟且望他日之遠大錯施雜用精神不應文理差舛久而無驗心志怠忽則雖已興已治之餘衰亂出焉況欲求其興且治乎所謂當先明治國之意何也蓋當微弱之時則必思强大當分裂之時則必思混并當讎恥之時則必思報復當弊壞之時則必思振起當中國全盛之時則必思維持保守當夷狄賓服之時則必思維兼愛休息先視其時之所當尙而擇其術之所當出不可錯施而雜用也堯舜三代莫不皆然秦漢以還可稱之

君暨我本朝藝祖太宗聖人迭起積其勤勞奮其勇智功隆業鉅垂裕來葉何嘗有迷其時而誤其術者哉陛下以臣之言視今之時則其時果當尙而其術果當何擇歟豈以爲微弱而當思强大分裂而當思混并讎恥而當思報復弊壞而當思振起歟抑以爲中國全盛而當思維持保守夷狄賓服而當思維兼愛休息也無乃當微弱分裂讎恥弊壞之時而但處之以中國全盛夷狄賓服之勢用維持保守兼愛休息之術而欲庶幾乎强大混并報復振起之功歟治道之象微而難知臣雖至愚竊論今日之事恐其由前之時而處以後之勢用後之術而欲求前之功補瀉雜醫不能起疾禾莠雜種迄靡豐年此所謂治國之意當先明者也誠先明其意則國之所是可斟酌而定議論趨向可審詳而決課功責效可歲月而待臣昧死願論今

日之未善者六事皆治國之意未明之故何謂未善者六事今日之國勢未善也今日之士未善也今日之民未善也今日之兵未善也今日之財未善也今日之綱紀法度未善也何謂今日之國勢未善請卽漢唐之興衰以攷見宣和靖康之始未漢中衰也爲王莽所篡尺地一民非諸劉之有矣然其人心猶未潰也故光武以宗室疎屬至與乞食之飢民聚謀協力卒以誅莽而盡復漢業者二百年唐自天寶之後大亂相乘盜竊名宇跨據藩鎮者接踵加以世有內患日就衰削亦以其人心猶未潰也故猶得專主行其命令盡羈縻其土宇者百五十年不至於播遷不復而使中原遂爲左衽也國家宣和靖康之變雖曰小人造釁力取幽燕貪功不靖激成禍亂然三鎮雖割而其民未嘗願降也京師雖陷而天下未嘗有變也虜雖以威立

張邦昌劉豫而姦雄未有崛起而與我抗者也建炎巡幸遠至温台從衛隆祐分適洪贛川陝處置自爲扞禦三方阻隔不相聞知然臣民奔走愛戴無異平日及劉豫再犯江淮兀朮復取河南震動陵逼自以爲豕突之勢莫之敢校然將士用命首尾鏖擊豫以退卻而兀朮大敗卒甘心而求盟焉自是宣和之末至紹興十年之後凡二十年之間中國實無潰叛之形也然終不免於罷兵增幣分裂南北以和寇讎大則無東漢戡復之勳小則無晚唐羈縻之政何也此臣所以深疑當時治國之意未明於微弱分裂讎恥弊壞之時猥用維持保守兼愛休息之術柄鑿不合矛盾相戾畏而安之佐成其鋒以致此也自是以來幾二十年顏亮兇狂離其巢窟跳躑一戰鼓聲所震常潤之屋瓦幾無寧者當是之時我方過於防慮豈敢謂其真送死

乎然而胡人篡之華人叛之卒殞其首於是中原響合殆將百萬而我以素無紀律之兵聲勢不接猶能所向有功是中國雖名屬彼而實未嘗潰叛於我者如故也自是以來休而息之愛虜而不敢愛中原者又幾三十年矣歲月雖已遠長老雖已亡號令雖已絕然而臣揆之天理驗之人心察之事勢雖其名屬彼而實未嘗潰叛於我者猶在也陛下蓋先明所以治其國之意而斟酌國是於此乎且夫微弱者必思强大湯以七十里文王以百里是也分裂者必思混并秦晉隋之力爭藝祖太宗之無敵是也讎恥者必思報復夏少康越句踐漢武帝唐太宗是也弊壞者必思振起秦孝公周世宗是也豈昔之能斟酌國是於此而今有不能乎若曰業已然矣吾獨奈何又曰天不悔禍吾其敢逆事之未立則曰乘其機也不知動者之有機而

不動者之無機矣縱其有機也與無奚異功之未成則曰待其時也不知爲者之有時而不爲者之無時矣縱其有時也與無奚別然則用後之術而欲求前之功治國之意終於未明而今日之國勢亦終於未善而無所復論矣何謂今日之士未善自古國家曷嘗不以任賢使能爲急歟然而以意行事以人勝法者乃今日之所諱也故事之曲折無不諉法習而行之吏胥所工士大夫媿焉幸時無事將迎唯諾自可稱職而賢能遂至於無用矣其無用也故今之修飾廉隅者反以行見異研玩經術者反以學見非志尙卓犖者反以材見嫉倫類通博者反以名見忌是豈世之惡賢能歟賢能之無用勢有以激之也錮於朋黨沈於卑賤老於巖穴何不可者然而臣竊怪其既無用於世矣而風流日以墜失士俗日以頹敗官無素望人無定品

諸路無平時之帥羣僚無充事之員舉躊躇嗟息而且以乏才爲患者何歟豈其旣以爲無用而可以抑遏又以爲有用而不可磨滅歟然則以爲有用而不求其實而收之以爲無用而不思其弊而救之者何歟此臣所以深疑治國之意未明而使今日之士未善也陛下蓋先明之乎若論矣何謂今日之民未善三代之養民臣猶未敢言也若夫漢當文景之際則公私有餘武帝則蕭然耗矣江左元嘉之政其盛衰亦然蓋民之富貧專繫其用兵之多少矣自紹興之中年及乾道淳熙將五十年中間用兵一二年爾亦可謂少矣民之富州縣之寬宜與文景比而今獨奈何民力最窮州縣最困歟試卽士大夫而問今天下之縣曰某可爲歟某不可爲歟其不可爲者十居八九矣又試

水心文集卷之一

十

卽士大夫而問今天下之州曰某可爲歟某不可爲歟其不可爲者十居六七矣又問其不可爲者何事歟曰月椿板帳爾總制上供爾歸正人官兵俸料爾又問民力之所以窮者何說歟曰役法爾和買爾折帛爾和買而又折帛爾然則國家有休兵之實過於文景而天下被用兵之害甚於武帝何歟此臣所以深疑治國之意未明而使今日之民未善也陛下蓋先明之乎若治國之意終於未明則今日之民亦終於未善而無所復論矣何謂今日之兵未善古人之兵以宿師爲拙以聚屯爲病不敢別異於民而特養之雖特養之不多數也一朝有事菽棗其食料簡其民雖少而未嘗不勝者厲而使之也今之特養者將兵禁兵廂兵世世坐食總其成數斯不少矣古人之兵患未得此數爾固足橫行於天下又有特養之大者御前之軍屯

駐四處鑄兵買馬截撥綱運貲力竭矣然而上下徬徨者曰兵不可不養也屈意仇讎堅守盟誓行人歲遣賒貨空矣然而內外怵惕又皆曰兵不可用也不知兵既不可不養而何以反不可用歟統副非人賸削廩賜卒伍窮餓怨嗟流聞議者又以爲就使用之終不可以致其死命也不知既不可用而徒養之又何以徒養之者爲累歟然則昔人之能厲其兵雖少而必勝今日之以兵自累雖多而愈弱者何歟臣所以深疑治國之意未明而使今日之兵未善也陛下盍先明之乎若治國之意終於未明則今日之兵亦終於未善而無所復論矣何謂今日之財未善財之善者不曰米粟布帛取於民力之所有歟及王制浸廢運漁鹽榷酒若以佐用度然終不盡利而亦不盡以金錢責其下之所無雖少而不得不足者蓋亦未至於一切肆行

而不顧也今之茶鹽淨利酒稅征權何其浩大歟雖漢唐極盛之時盡一天下之輸曾未能當今三務場之數其又有浩大者經總制錢強立窠名從而分隸和買白著折帛折變再倍而取累其所入開闢以來未之有也入既若是出亦如之蓋常倉卒不繼相視無策遂印兩界會子而權之者有年數矣不知取錢之多既若是而何以卒歲擾擾反憂不足歟今天下幸欲暫安於無事而徒以是錢爲患也設更有事其一切不顧而取之者又將覆出歟夫昔者不敢盡取雖少而猶足今日不顧而取之雖多而猶匱者何歟臣所以深疑治國之意未明而使今日之財未善也陛下盍先明之乎若治國之意終於未明則今日之財亦終於未善而無所復論矣何謂今日之紀綱法度未善昔之立國者知威柄之不能獨專也故必有所分控持之不

可盡用也故必有所縱三代以上星分碁布悉爲諸侯其
自居者千里而已此非後世之所能然猶堅植其四隅倚
之捍禦封崇其險阨示以形勢至於對立鼎峙雌雄所爭
則必隆其委任多其分畫豈無外重生姦跋扈致寇之患
哉歷代相承莫之或變蓋非不欲其密而亦不能不使之
疎也然則盡收權變一總事機視天下之大如一家之細
孰有如本朝之密者歟嗚呼靖康之禍何爲遠夷作難而
中國拱手歟小臣伏死而州郡迎降歟邊關莫禦而汴都
摧破歟今猶弗之悟也豈私其臣之無一事不稟承我者
爲國利而忘其讎之無一事不禁切我者爲國害歟豈其
能專而不能分能密而不能疎知控持而不知縱捨歟此
臣所以深疑治國之意未明而使今日之紀綱法度未善
也陛下盍先明之乎若治國之意終於未明則今日之紀

綱法度亦終於未善而無所復論矣恭承明詔念軍國之
利害不能究知生民之休戚無以自達法或不宜於俗事
或不便於時臣固以爲無大於此六者矣然而當先明治
國之意而已不先明治國之意使此六者本傷而未壞心
蠹而枝披支離渙散而臣之議論無所復用矣誠先明治
國之意則臣今所論特其目耳源流汗漫變故萬端非兼
攻古今不能盡其理非竝知難易不能通其變非獨悟良
策不能操其決非豫覩成效不能待其久也陛下不以臣
之愚試留聽焉誠欲先明所以治國之意則固當視今之
時陛下以爲今果何時歟果微弱歟則意固在於强大矣
果分裂歟則意固在於混并矣固讎恥歟則意固在於報
復矣果弊壞歟則意固在於振起矣在陛下審觀熟察而
已然則謂今之時爲中國全盛夷狄賓服者臣恐其名託

之而實非也謂治國之意當維持保守兼愛休息者臣恐其形似之而實謬也在陛下果斷改爲而已臣伏觀壽皇聖帝在位二十八年英武剛健勤勞恭儉整厲臣工變移風俗大志未酬親授陛下舜禹之美二典所載若帝之初何以過焉陛下嚴祗寅畏足以膺受付託仁恕溫厚足以慰答僊望虛心無我足以容受正直廣覽兼聽足以照臨欺蔽至公寡欲足以杜塞僥倖長駕遠馭足以招徠英傑於此而先明所以治國之意又何難哉譬之行天下者在所問津而已干犯旒扆無任恐懼

上寧宗皇帝劄子嘉泰三年

臣聞欲占國家盛衰之符必以人材離合爲驗昔周文武身致多士作而用之預卜天命最爲長久召康公爲成王賦卷阿之詩言求賢用吉士其興託淵然以深其旨意沃

水心文集卷之一

七

然以長不以美而以戒其詞曰藹藹王多吉士惟君子使媚于天子又曰藹藹王多吉人惟君子命媚于庶人夫上媚天子下媚庶人不以抗犯爲能而以順悅爲得此豈有諂曲之意存乎其間哉忠信誠實盡公忘家惟以國之休戚關憂樂不以己之曲直校勝負故能上爲人主所信下爲百姓所愛蓋人材合一之時和平極盛之治其效如此非末世所能及也往者陛下初嗣大寶臣服在百僚偶當進對輒不自已竊嘗申繹卷阿之義爲陛下獻天啟明聖德意開廣志慮日新銷磨黨偏秉執中道人材庶幾復合和平可以馴致臣災疾羸殘目覩斯事不勝感嘆臣聞治國以和爲體處事以平爲極和如庖人之味焉主於養口而無酸醎甘苦之爭也使猶有酸醎甘苦之爭則非和矣平如工人之器焉主於利用而無痕跡節目之累也若猶

以痕跡節目爲累則非平矣故善調味者必使衆味不得各執其味而善制器者必能消衆不平使皆効其平人臣誰無有己惟明主能使其忘己仁宗初年嘗有黨論至和嘉祐之間昔所廢棄皆復湔洗不分彼此不問新舊人材復合遂爲本朝盛時臣久病積衰已絕榮望區區之愚所期人臣忘己體國銘心既往圖報方來如子事父無有怠竭職任所係畢知陳力分守所嚴極忠盡敬不私一身以自徇而與公家相爲先後如此則下知和平之實義上享和平之實福遠追文武近法仁宗以無媿於卷阿之詩陛下財幸

劄子二

臣病苦餘日聖恩垂憐使轉漕湖外守符泉南今又特蒙收召入奏之初有兩處職事不敢不陳愚慮臣採湖南土

民之論以爲二十年來歲雖熟而小歉輒不耐地之所產米最盛而中家無儲糧臣嘗細察其故矣江湖連接無地不通一舟出門萬里惟意靡有礙隔民計每歲種食之外餘米盡以貿易大商則聚小家之所有小舟亦附大艦而同營展轉販糶以規厚利父子相襲老於風波以爲常俗其不耐小歉而無餘蓄勢使之也故每遇小歉閭里不能自相給惟仰州縣賑救城市之民青黃未接食於常平者十家而九此事諸司當任責而漕司爲一路通融有無之處其責尤重然湖南漕司歲計所入甚少比江西纔十之三四比湖北纔十之五六曾不足以支本司一年之經用向者團簇大軍錢數多總司所取不盡可以通借故不自覺而反冒富厚之名自大軍錢屢減舊額總司按籍盡取積以歲月坐致漏底今漕司索然窮匱者五六年矣除湊

足交頭之外每遇新舊交易使者與屬官聚議搏手無以具接送之費臣比承乏諸郡小歉雖先事講求荒政終不能有所捐貸爲諸司之倡去歲祁陽蔣圜十借糧作過守令張皇一時駭動幸而就擒欲出少米以哺之力不能及竟闕默而止臣以爲一司事力殫乏至此平居不足以自存萬一水旱急難辜負任使利害不細臣每念漕司所得屬郡財賦久失定規不可復取本司當自擇其間利源與州縣百姓不相干涉及他司有例可以參酌施行者以漸經理庶稍有餘積爲萬一水旱急難百姓指準之地此誠一路之急政不可忽也臣頃雖熟計不敢奏陳蓋初始旣難而臣方病昏不能勝任今有通練敏達之士授以意指俾之講求許其自行無使貽害足以爲一路之預備寬九重之顧憂豈不幸甚

劄子二

臣切以泉南素有樂郡之名與他州異蓋上供皆承平常賦過取殊少起輸以產錢定入橫費不多吏畏民不輕出令民愛吏思其遺化每示蠲放不知督迫郡計所入僅僅無餘比因更易頻仍通約歲終當欠四萬餘緡臣將去官百方補湊元交之數極爲費力若更積累日月竊恐所欠愈甚昔之已放不免復取一切之政既行吏民交相恨望樂郡之名自此不可復得矣臣仔細考究乃有本州合得財賦遞年循習不加整會者二事其一南外宗子等請受錢準元降指揮轉運司與本州各應副一半今照嘉泰二年計支一十三萬餘貫而轉運司自淳熙十五年终應副四萬八千餘貫又增撥漳州有名無實者其實每年只取惟二萬一千餘貫而已其米價錢轉運司合撥一萬五千

貫近年只應副一半三項截日計虧少本州錢四十二萬二千餘貫其一本州遞年代爲宣信建昌邵武四郡發納上供銀一萬五千六百餘兩四州軍却合應副本州衣絹紬等自減半之後通計五千五百餘匹綿七千餘兩惟信州取足而疎惡不堪三州軍每年計虧三千二百餘疋積欠紬價至五十九萬八千餘貫臣以爲此二事於一郡非小故也且轉運司以合應副之錢委之本州使自陪備以困民力其理豈得穩便况三州軍士上供銀本州每年兩限起發不敢違欠銖兩而三州軍坐視不還使本州自擘畫衣綿支散官兵於義安乎蓋轉運司於本州爲所部官吏雖常伸翹不敢取必而三州軍彼此列郡不相統臨坐視積欠遂至百餘萬緡自應然爾自非守臣開析利害達於聖聰而陛下惻然主張特發聖訓厥弊無由可革欲乞

睿旨轉運司須管照元降指揮今後每歲應副本州一半宗子米價等錢並令支實價不將有名無實者搪拄充數以至欠折其三州軍上供銀并本州衣絹今後並令各自措置所有以前積欠却與盡行豁除如此則本州歲實可省三萬餘緡守臣更加撙節以補不足庶幾已放者不至復取一切之政亦未遽行樂郡之名可以不失仰稱陛下加惠泉民之意

上寧宗皇帝劄子 開禧二年

臣聞甘弱而幸安者衰改弱以就强者興今陛下申命大臣先慮預美思報積恥規恢祖業 蓋欲改弱以就强矣臣宿有志願中夜感發竊謂必先審知今日强弱之勢而定其論論定而後修實政行實德如此則弱果可變而爲强非有難也臣將博陳極論而事闕語長誠恐久留天聽

臣每念契丹累世大國也女真乃以數千人捭鬪而天祚無戰不北遂至於亾以勢而言當是時我疑若可以分功者然終不得一逞而盧溝之役累世軍實皆殲焉何至此哉又況西兵我之勁卒也方臘猝叛聲搖汴都諸將提偏師俘臘無遺種矣渡江以後扈衛艱難誅翦盜賊大抵西兵西將之餘也夫契丹以燕遼全盛之力而滅於女真崛起之兵我以關陝驍悍之師而敗於契丹垂盡之將然則宣和強弱之勢斯可識矣自是以來京城則陷中原則失維揚則渡江會稽則航海十年之間未有能與女真抗者也其後虜與逆臣劉豫迫我不已激而思應於是我始能勝於大儀又勝於李家灣又勝於順昌柘臯而虜始與我定和矣顏亮兇狂自殞而我始能以敵國自立矣夫虜以敗殞而後和雖和而猶不失爲雄我以應久而後勝雖勝

而猶不敢盡用然則紹興隆興強弱之勢又可驗矣今欲改弱以就強移迫動應久之兵而爲問罪驟興之舉作東南幸安之氣而摧女真素銳之鋒此至大至重事也誠宜深謀誠宜熟慮宜百前而不懼不宜一卻而不收故必備成而後動守定而後戰今或謂虜已衰弱虜有天變虜有外患怵輕勇試進之計用麤武直上之策姑開先釁不懼後艱求宣和之所不能爲紹興隆興之所不敢此至險至危事也臣願陛下先定其論論定而後修實政行實德變弱爲強誠無難者在所施設如何爾取進止

劄子二

臣所謂備成而後動守定而後戰者臣伏覩建炎紹興渡江之後非不欲固守兩淮襄漢而虜人衝突無常勢不暇及旣議和好則收兵撤戍已有定約又不敢謀故淮漢干

餘里常蕩然不自保也今雖分兵就邊稍圖外向然我既能往彼必能來是時淮漢守備不全倉猝不過移治而專倚大軍迎敵勝負不可知要必扼江而後止如此則往者未足以係西北之望而來者已足以搖東南之心矣本期外攘豈願內擾萬一搖動將何賴焉故臣欲經營瀕淮沿漢諸郡各做家計牢實自守虜雖擁眾而至阻於堅城彼此策應首尾相接藩牆禦扞堂奧不動然後進取之計可言矣此臣所謂改弱就強實政之一也四處御前大兵國家倚以爲命歲費繕錢數千萬米斛數百萬東南事力盡矣譬如亭子所賴四楹一楹有闕累及三陲無獨全者臣慮其間統副將校人馬器甲營伍隊陣進戰退守必然未能一一皆是若今所委付果已得人尤宜曉夕用心事事警策件件理會若其人未當則利害甚多伏惟陛下審之

重之此兵幾三十萬未可便望一可當十十可當百但一人真有一人之用淮漢能守此兵能戰數年之內制虜有餘此臣所謂改弱就強實政之二也圖此大事莫先人材陛下比年首以大義倡率而在廷之臣和者極寡此未必皆怯懦首鼠不肯任責也亦由積安之久素所不習耳聞目見茫然生疎昔宇文粹中論京城守具白時中自謂事非經歷則不知而況兩陣決機有大於此乎今天下亦非無智意材力願得自効若淮漢千里果當固守四處大軍果當精練四方之才隨其小大宜付一職使之觀事揆策以身嘗試習熟漸久方能捨燕安而樂麤澁易脆腐而爲堅強勁虜在前行者思奮此臣所謂改弱就強實政之三也至於朝廷之上封域之內綱紀法度號令賞罰黜虛從實條目至煩然總先是三者則其餘可次第舉矣取進止

臣所謂行實德者臣竊觀仁宗英宗號極盛之世而不能得志於西北二虜蓋以增兵旣多經費困乏寧自屈已不敢病民也王安石大挈利柄封樁之錢所在充滿紹聖元符間拓地進築而斂不及民熙豐舊人矜伐其美然陳瓘譏切曾布以爲轉天下之積耗之西邊邦本自此撥矣於是蔡京變茶鹽法括地寶走商賈所得五十萬內窮奢侈外熾兵革宣和之後方臘甫平理傷殘之地則七邑始立燕雲乍復急新邊之用而免夫又興自是以來羽檄交警增取之目大者十數而東南之賦遂以八千萬緡爲額焉多財本以富國財旣多而國愈貧加賦本以就事賦旣加而事愈散然則英主身濟非常之業豈以貨財多少爲拘近者國用置司偶當警飭武備之際外人但見立式太細

鈎校甚詳不能無疑謂將復取臣獨以爲不然何者名實不欺用度有紀式寬民力永底阜康此詔書也兩浙鹽丁旣盡免矣方以寬民而何至於復取乎參攷內外財賦所入經費所出一切會計而總覈之其理固當然臣謂國家之體當先論其所入或恃足以殃民則所出非經其爲蠹國審矣今經總制月輸青草折估等錢雖稍已減損猶患太重趁辦甚難而和買折帛之類民間至有用田租一半以上輸納者貪官暴吏展轉科折民旣窮極而州縣亦不可爲矣以此自保懼無善後之計况欲規恢宜有大賚之澤伏乞陛下特詔大臣使國用司詳議審度何名之賦害民最甚何等橫費裁節宜先減所入之額定所出之費不須對補便可蠲除小民蒙自活之利疲俗有寬息之實陛下修實政於上而又行實德於下和氣融浹善頌流

聞此其所以能屢戰而不屈必勝而無敗者也改弱以就強孰大於此凡此皆其大要而已陛下不以臣爲愚且迂敢不自竭而詳陳焉取進止

水心文集卷之一

子

水心先生文集卷之一

此地皆其大要而已陛下不以臣爲愚且迂

敢不自竭而詳陳焉取進止

水心先生文集卷之二

狀表

安集兩淮申省狀

右逐一開具在前外然其間利害曲折亦復不少某竊照去歲虜入兩淮所殘破處安豐濠盱眙楚廬和揚凡七郡其民奔迸渡江求活者幾二十萬家而依山傍水相保聚以自固者亦幾二十萬家今所團結卽其保聚不流徙者雖不能盡在其中大約已十餘萬家矣其流徙者死於凍餓疾疫幾殫其半而保聚之民亦有爲虜驅掠而去者散爲盜賊則又不在焉度今七郡之民通計三十萬家和議未定室廬不成就使和議有定其短長之期又未可知此三十萬家者終當皇皇無所歸宿蓋淮上四戰之場虜敵往來之地民生其間勢固應爾然自古立國未嘗不有以

水心文集卷之二

一

處之也無以處之則地爲棄地而國誰與共守設使今歲邊報復急此三十萬家者又將奔迸流徙而喪其生乎春秋戰國之時畫國而守大爲城邑小爲壘壁百里之國皆有邊面自非暴君苛政其民未嘗散之四方兩漢以後裂爲南北中原不合者凡數百年人在戰地各自爲家養生送死老子長孫未嘗有闕彼非有以自守不肯輕棄其鄉安能如此自唐以後至於本朝以和戎爲國是千里之州百里之邑混然一區烟火相望無有扞蔽一旦胡塵猝起星飛雲散無有能自保者南渡之後前經逆亮之禍近有僕散揆之寇累世生聚一朝蕩然故某昨於國家營度規恢之初以爲未須便做且當於邊淮先募弓弩手耕極邊三十里之地西至襄漢東盡楚泗約可十萬家列屋而居使邊面牢實虜人不得踰越所以安其外也蓋漢唐守邊

郡而安中州未有不如此者也今事已無及長淮之險與虜共之惟有因民之欲令其依山阻水自相保聚用其豪傑借其聲勢縻以小職濟其急難春夏散耕秋冬入保大將憑城郭諸使總號合虜雖大入而吾之人民安堵如故扣城則不下攻壁則不入然後設伏以誘其進縱兵以擾其歸使此謀果定行之有成又何汲汲於畏虜乎所以安其內也夫徒手搏虎以幸其斃一夫之勇也一夫之勇未必驗而一夫之怯其爲驗也決矣爲天下者不以天下之大而就一夫之勇故某願朝廷以謀困虜以計守邊安集兩淮以扞江面使淮人不遁則虜又安敢萌窺江之謀乎故堡塢之作山水寨之聚守以精志行以強力少而必精小而必堅母徇空言而妨實利則今日之所行與漢唐之屯田六朝三國春秋之壘壁彼各有以施之不相謀而相得故也伏乞照會指揮施行

水心文集卷之二

二

定山瓜步石跋三堡塢狀

某昨蒙差兼江淮制置專一措置屯田被命之始卽嘗深念以爲今之屯田與昔不同夫省運就糧分兵久駐磨以歲月待敵之變此昔日屯田之常論也頃自虜寇驚騷淮人奔迸南渡生理破壞田舍荒墟十郡蕭然無復保聚今之所急在於耕其舊業而復其所常安守其舊廬而忘其所甚畏爾豈得以昔日之常論冒行之乎故某逐急且於江北創立三堡先作一層今三堡旣就流民漸歸所宜招徠安集量加賑貸合於東西二百里南北三四十里之內其舊有田舍者依本住坐元無本業隨便居止其間有強壯者稍加勸募給之弓弩教以習射時命程試利以賞激度一堡界分內可得二千家爲率萬一虜騎今秋再至

隨處入堡與官兵共守此今日經營之大略也至於屏蔽江南防把口岸則其說尤長敢不盡布愚悃某去歲忝綴朝列首建防江之議繼來建康攷詳前後案牘無非葺治戰艦布列岸兵栽埋鹿角釘設暗樁開掘溝塹計步而守數里而屯皆元勳故老之已行謀臣策士之素講雖其間用之有利不利然終未有能捨此而特立者也况某晚進末學何所能爲不過守舉舊事期於無闕而已如鹿角暗樁之類去歲論者固嘗指爲兒戲及扣其別有何策則又寂無所言某猶謂厲人心而堅守阻大江而自固則如前數事亦豈不足以立功至十月之末邊遽告急淮人渡江以億萬計江南震動眾情惶惑一日有兩騎僞效番裝躍馬江岸相傳虜人至矣濟渡之舟斫纜離岸檣楫失措渡者攀舟覆溺數十百人某始歎息曰是真不足賴也今雖

岸步有寨江流有船鹿角暗樁數重並設溝塹深闊不可越踰其如人心已搖誰與力拒萬一虜兵果至彼皆棄之而走爾所以建炎紹興之間兀朮輩未嘗不徑渡江南如逆亮之不得濟而殞者幸也於是始捐重賞募勇士渡江北劫虜營石跋定山上下凡十數往返取其俘馘係纍以報江南奮氣見者賈勇而人心始安虜亦由此卷甲遁矣然後知三國孫氏常以江北守江而不以江南守江至於六朝無不皆然乃昔人已用之明驗自南唐以來始稍失之故建炎紹興不暇尋繹爾然渡江之兵苦於江北無家基寨無所駐足故石斌賢之徒不能成大功宣司嘗急呼封彥明王益欲令將兵策應和州竟閱嘿而止今石跋則屏蔽采石定山則屏蔽靖安瓜步則屏蔽東陽下蜀西護

廐陽東連儀真緩急應援首尾聯絡所築皆是故基磚石

猶在今各堡無事之時只以五百人一將戍守常加修葺勿使廢壞收聚居民與之爲主令岸渡繁會自成市井若萬一有警乞從朝廷卽令各堡增募一千人照吐渾等仗竝與幫收總領所請給隨堡防守教閱諸州禁兵抽摘二千人以九月至并於防江效用內摘那千人各堡二千五百人并堡塢內外居民二千家之勝兵者或臨時旋行招募亦各二千人各堡通爲四千五百人相共守把然後令制置司以八九月別募精勇敢死士千人厚幫請給以待劫寨焚糧直前搏擊之用蓋堡塢之成於防江有四利徃日江南列營五萬人去歲亦不下三萬而民兵不預然止可坐食而守敵果窺江責其不走固已難矣而况進戰乎何者虜在北岸共長江之險兵衆騎多而吾軍之氣已奪矣今堡塢旣立虜有所忌固不敢窺江就使來窺江南岸

兵膽氣自生志力得展使之前進無所畏怯一利也雖有各處戰艦然虜已在江岸或聲言奪船徑渡或實爲造舟之勢我之舟師徃徃不敢放出北岸勝負未決旁觀膽落憂恐萬端今堡塢旣成虜縱在江北我有應接之利或近岸排列千弩竝發或捨舟登岸乘勢擊逐二利也至於海舟風帆八面便利捷疾尤在舟師之上然迫虜於岸而收全功者其勢易俟其入江而決死鬪者其勢難今堡塢旣成有易無難三利也戰艦甲士虛閉舟中擁戈坐觀從昔病之無策可治今舟得便利人無虛設四利也使虜果忌堡塢爲彼之害或擁大衆志在必取今石跋瓜步近在江津定山去江纔三里爾我以戰艦海舟爲江中家計強弩所及虜人腹背受敵自投死地理在不疑脫若虜人畏而不前置而不問盡力攻擊和淦真六合等城或有退避我

以堡塢全力助其逐襲或形其前或出其後制勝必矣此堡塢之利所以爲用力寡而收功博孫氏六朝以江北而守江南能立國於百戰之餘者非幸也數也故某欲因屯田堡塢之立收兵民雜守之用屏蔽江面先作一層使江北之民心有所恃虜雖再來不復求渡騰突紛擾貽亂江南次第入深因其險要用其豪傑見團結山水爲寨者四十七處此於官司之力無緣周遍特借以聲勢使自爲守春夏散耕秋冬入堡蓋孫氏六朝保固江淮之成規非充國先零棗祇許下之謂也不然則南北並爭之際無歲不有兵革淮人豈能屢逃屢復以自濱於流離死亡也哉某自去冬憂悸熏心舊疾之外復增新病背病半年呻吟宛轉自有改兼江淮之命不敢辭避力疾督趣成此三堡其間條目極有未備而某羸證旣成不能扶持忍死以待畢事豈勝慚懼伏乞朝廷速賜選擇總練通方老於智謀之士前來建康糾剔某妄作疎漏之失攷尋前史規畫縝密之舊克集功緒以究遠圖某不任祈扣之至所有定山瓜步石跋三處堡塢圖本并四十七處團結山水寨居民戶口姓名帳冊謹隨狀繳申伏乞指揮施行

辭免華文閣待制提舉西京嵩山崇福宮狀

次對之職爲選甚高曩玷留都雖嘗假寵退甘窮巷固已黜幽恍歲月之屢遷何夢寐之敢及七十旣至一再控陳但得歸休便爲止足豈意矜憐枯瘁委曲陶鎔特畀新除復還舊物然而竊尋故實兼考前文惟必諧告老則或容口口以示恩今猶使奉祠則安得因閑而冒受夙夜自揆震驚靡遑伏乞俯諒微誠特賜敷奏寢免華文閣待制恩命只以本官依舊宮觀不越常分庶幾少安無任跼踖俟

命之至

辭免除寶謨閣直學士提舉鳳翔府上清太平宮狀
聞命殊常省躬震越蓋臣子年耄而食貧上所矜閔則爲
之改祠賦祿所以示恩也至於超進職名寵允榮耀將以
爲勸則非德進而業廣不在茲選某頽齡暮景貧病交迫
伏蒙至仁曲加憐念特畀祠官所宜祇服恩私俯僂拜受
無敢後矣恭惟先帝大訓華閣祕藏學士寓直最爲清近
而某志行凋落問學空殫性與年徂材隨老盡儻若貪榮
冒處不知自引是彰聖朝濫予之過而非所以爲勸也伏
望鈞慈特賜敷奏令某止仍舊職寅奉新祠所有寶謨閣
直學士恩命乞賜寢免不勝俟命之至

辨兵部郎官朱元晦狀

臣聞臣子告君父之言必以實非其實而敢告者惟私意

水心文集卷之二

六

之是徇而忘君父之爲不可欺者也臣竊見近日朱熹除
兵部郎官未供職間而侍郎林栗急劾去之士論怪駭莫
測其故蓋熹素有文學行誼居官所至有績因王淮深惡之
遂不敢仕陛下差熹江西提刑使之奏事熹趨起辭避終
未敢前淮旣罷去陛下趣熹入對用爲郎官人知陛下進
熹有漸無不稱慶忽爲栗誣奏逐去眾議所以洵洵不平
臣始疑之以爲栗何故至此得非熹果有罪外人不能知
而栗獨得其實以告陛下也暨栗劾奏熹文字傳播中外
臣始得以始末參驗然後知其言熹罪無一實者特發於
私意而遂忘其欺爾栗雖貴而近臣雖賤而遠然臣子之
於君父大義一也烏有栗以熹不實之罪欺罔君父之前
而臣忍不以實陳於陛下乎栗言熹敢自稱私計非便只
欲回就江西提刑已受省劄不肯赴部供職臣聞熹旣受

除郎官省劄卽時遣回江西提刑司接人客將兵卒等皆已辭去其時朝士有候熹者皆共見之熹以腳疾發動不任下牀遂申尙書省乞給假候痊安日供職是栗謂熹只欲回就江西不肯供職者非其實也栗言熹四司郎官廳印記不有收受推出門外令送長貳緣長貳不合收管郎官廳印記臣再令送還仍加鑄諭既能出入官門上殿奏事并遍謁宰執臺諫卽乘轎入部供職良不爲難兼郎官印記難以棄擲在外慮有失去其朱熹堅執不從臣爲貳卿不能率屬致其偃蹇拒違君命實負慚德所有印記無所歸著不免令四司人吏抱守終夕至于達旦且臣聞熹未對之前腳疾已作當對之日偶然少止對下之日後與宰執臺諫相見腳疾痛復劇旣申尙書省祇受恩命止乞給假供職適會歇泊旬休未及將上所有郎官印記熹旣

未供職豈可受乎熹已申省乞給假矣雖欲聽栗鑄諭而扶曳供職可乎郎官未供職以前印記合是何官收掌此正長貳之所當知其可推以委熹乎是栗謂熹不受印記偃蹇拒違君命非其實也栗又言熹本無學術徒竊張載程頤之緒餘以爲浮誕宗主謂之道學妄自推尊所至輒攜門生十數人習爲春秋戰國之態妄希孔孟歷聘之風繩以治世之法則亂人之首也臣聞朝廷開學校建儒官公教育於上士子闢家塾隆師友私淑艾於下自古而然矣使熹果無學術歟人何用仰之果有學術歟其相與從之者非欲強自標目以勸人爲忠爲孝者乃所以爲人材計爲國家計也惟蔡京用事諱習元祐學術曾有不得爲師之禁令栗以諸生不得從熹講學爲熹之罪而又謂非治世之法宜禁絕之此又非其實也栗又言熹欲索高價

妄意要津傲睨累日不肯供職以爲作僞有不可掩夫粟逆探熹之用心而暴揚之此非臣之所得知也臣所得知者熹以今月初八日除郎十一日再爲江西提刑粟之劾熹當在初九初十爾相去隔日之間而粟以熹累日不肯供職是粟急於誣熹而不自顧其言之非實也粟又言陛下愛惜名器館學寺監久次當遷郎官者只令兼權其視郎選亦不輕矣而熹乃輕之兵部郎官本係大宗丞計衡兼權以熹之故移計衡於都官而以兵部處熹所以待熹亦不薄矣而熹乃薄之臣聞陛下明詔曾任監司知縣者始得除郎其事久矣館學寺監雖久次而未嘗厯知縣監司則不免兼權豈得謂其當遷郎哉差除之際那換闕次移衡用熹熹何德焉是又粟急於誣熹之罪組織其言語足其文爾而不自顧其言之非實也粟又言職制者朝廷

之紀綱熹既除兵部在臣合有統攝乞將熹新舊任並且停罷臣聞唐左右丞進退郎官矣本朝故事未之或然惟臺諫彈劾有停斥之請給舍繳駁有寢罷之文至於六部寺監舉劾其屬必曰乞行迴避微其文婉其義所以重臺綱尊國體也今熹得爲粟之屬尙未供職而粟望風劾之且兼用給舍臺諫繳劾百官之例何哉粟以職制紀綱劾熹而先自亂之是職制紀綱非其實也凡粟之辭始末參驗無一實者至於其中謂之道學一語則無實最甚利害所係不獨朱熹臣不可不力辯蓋自昔小人殘害忠良率有指名或以爲好名或以爲立異或以爲植黨近創爲道學之目鄭丙倡之陳賈和之居要津者密相付授見士大夫有稍慕潔修羸能操守輒以道學之名歸之以爲善爲玷闕以好學爲過愆相爲鉤距使不能進從旁窺伺使不

獲安於是賢士惴慄中材解體銷聲滅影穢德垢行以避
此名殆如喫菜事魔影迹犯敗之類往日王淮表裏臺諫
陰廢正人蓋用此術此於陛下彰善黜惡封殖人才以爲
子孫無窮之命者其損不細矣栗爲侍從就其蹇淺無以
達陛下之德意志慮示信於下而更襲用鄭丙陳賈密相
付授之說以道學爲大罪文致語言逐去一熹自此游辭
無實讒口橫生善良受禍何所不有臣伏見栗恥不得與
廟號之議遂爲樂堯之說而人知其橫怒詳定所人吏執
覆遂請罷局而人知其專而況職匪風聞古有常守今又
苟恣一身之很復不畏君父之高明公形無實之言顯逐
知名之士陛下原其用心察其旨趣舉動如此欲以何爲
誠不可不預防不可不早辨也臣去冬蒙恩面對論一大
事有四難五不可之條其說至長未獲究竟方齋心滌慮
以俟陛下反覆詰難庶幾竭盡愚衷今以郎官去留何至
上封事譏諛徒溷宸慮哉蓋見大臣以下畏栗兇猷莫敢
明辨積在厲階將害大體爾伏願陛下正紀綱之所在絕
欺罔於旣形無惟其近惟其賢無惟其官惟其是摧折暴
橫以扶善類奮發剛斷以慰公言國家之本孰大於此臣
不勝效忠思報之至干冒宸嚴伏地待罪

淮西論鐵錢五事狀

臣竊見近歲私鑄鐵錢散漫江淮公私受弊人情搖動其
事多端幸蒙朝廷不惜厚費特與收換始得寧帖臣昨在
蘄州目見利害詢採吏民頗爲親切今暫領兼司所當隨
時補緝務使淮人迄臻安靜謹具奏聞其事有五一日開
民間行使之路二日責州縣關防之要三日審朝廷稱提
之政四日謹諸監鑄造之法五日詳治司廢置之宜何謂

開民間行使之路始初鐵錢不分官私民間不辨好惡得錢便使自禁私錢百姓懲創賣買交關文文揀擇或將官錢指爲私錢不肯收受或只要一色樣錢謂如舒蘄人各類之只使本監字號或只要新鑄官錢且免揀擇民旅持錢買物一貫之中常退出三四百至以米穀他物自相酬準城市尙可村落尤甚緣此行用艱難物貨稀少朝廷禁斷私錢本要流通官錢若官錢方更疑惑豈得穩便臣近以乾道同安勦

春大冶宿松漢陽定城新舊諸樣官錢釘板印榜曉諭民間令其從便行使亦立私錢樣令揀選不用令各州簽廳官委諸縣釘樣於都保又別差官親至村落委曲勸諭欲其耳目接熟用錢不疑須待官錢流通物價復舊方見禁斷私錢之利在臣本路已逐一如此施行其淮東湖北臣目所不見未知如何近因還司過蘄口鎮鎮民詣臣稱揚

水心文集卷之二

十

真泰州凡紹熙元年二年蘄春監所鑄錢皆嫌麤惡揀退不使臣尋令拆辯揀擇其字文模糊尤甚十居二三見已關會諸處別議措置然則揀擇用錢人情不甚相遠兼既有新舊諸錢并私錢色樣不一曾經揀換錢文牴牾若不於行使地分明加告報終恐向後用者疑惑臣不敢作治司發往兩路州郡欲乞自朝廷降樣行下永遠照使要令村落僻遠認識不疑民旅交易流通無礙如此則既擾之精神可以收回人亦知收換之實利矣何謂責州縣關防之要兩路先後立限收換私錢淮東多而淮西少雖緣禁有遲速之故然積累數年委有許多私錢別無歸著其當與收換則一爾今已於限內申報盡絕而舊色私錢尙頗散在民間或限內齎赴不及出限不可投換或貫百少可無力投換或富人收藏意圖他時禁弛復得行用既各盡

絕難卹其餘然市錢用之中常有夾帶所幸民間識認擇出不要其新鑄私錢間有三兩文到市上者姦民窺伺豈肯遽已自禁戢以來號令紛紛爭爲嚴峻或令五家結甲或令旬申有無私鑄巡尉以捕捉入銜敗獲治經由透漏沿流常要巡綽津渡皆須搜邏吏人甘伏決配官員當俟朝典臣檢照舊事及不住承準申明雖皆已遵守覺察然終未得關防之要必行則誣告羅織獄訟繁興泛行則便同文具姦宄仍在臣近令各州簽廳官責屬內廂巡地分都保等處專一禁止行使私錢之家旬具委無行使私錢結罪類申本司只此一令不必繁多但要行之堅久私錢無用私鑄自息此雖治司職事亦但可施之本路欲乞朝廷指揮於行使鐵錢州郡除照官錢色樣從便流通行使外並要本州月具更無行使私錢文狀結罪申尙書省蓋

欲必無私鑄其說難信欲必不使私錢其事易遵况經收換朝廷爲民之意已足如有違戾懲治大吏一人自然震聳用命如此則令簡而可行實而可久矣何謂審朝廷稱提之政始作鐵錢非要添此一項泉幣蓋專以絕銅錢滲漏之患爾銅錢過江北既有鐵錢以易之矣鐵錢過江南亦必有銅錢易之可也今爲銅錢地而不爲鐵錢地事不均平豈行法以來偶未之思歟故江北自行鐵錢之後金銀官會無不高貴富商大賈財本隔礙而淮旁之民只是往來兩岸洲夾之內銅鐵異用風波滯留便已盤費消折安居雖久仍舊凋疎准人歎息以爲朝廷緣銅錢之故致合江北不得自在空懷抑鬱無與上聞近戶部建明權作兩淮交子百萬通行沿江州郡仍許入納准人若驟得此數行用稍廣目前利益但臣採其土俗之論以爲月日稍

久流轉不行必有減落百陌之憂將爲店鋪停塌之利若要稱提得所義理均平當使鐵錢之過江南亦如銅錢之過江北皆有兌換之處兩無廢棄之虞於江南沿江州郡以銅錢會子中半或一分銅錢二分會子直行兌換鐵錢計其所收或科撥付總領所或仍換銅錢則可以減諸監歲鑄之額或付兩淮和糴樁積馬料修城則更不支降交會亦於朝廷初無所失淮人知鐵錢過江有兌換之處自加貴重商旅之存淮南者亦不敢輕賤鐵錢則金銀官會及其他物貨自當低小如此稱提雖行鐵錢可以經久無弊若恐鐵錢過江兌換者多自合量宜撙節但要存此發泄一路而已何謂謹諸監鑄造之法臣切詳興監以來所鑄鐵錢其輕重薄厚精麤大小略爲相等就中淳熙七八九年中間蘄春監所鑄字畫精細輪郭堅明比於諸錢又

爲精好十五六年以至紹熙元二則頓成麤惡習久生弊勢亦宜然昨鐵冶司急欲取勝盜鑄者遂翻新樣四季別爲字文舊重四斤十二兩今增爲五斤八兩新錢比舊大幾一輪臣竊以錢文宜一輕重大小宜均則民聽不疑行用不惑季別一樣自鑄工不能記憶民間何由辨認而又新錢特大形迹舊錢常人之情喜新厭舊所以有只要新錢之說豈可舊錢遂成無用又特大者自爲貫辨則可行使分開互用串聯不合臣細視之新錢刻畫麤大其實不如舊錢用鐵雖多錢體不重但加比驗自可分明兼照自淳熙七年至紹熙二年上半年同春兩監通鑄過四百餘萬貫七年前及他監所鑄又未有數目前公私行用官中自應保護舊錢其新錢但當鈐束監匠盡工鑄造深鑿末年之弊必如初鑄之精而已若徒翻樣增鐵以自別異

深所未可故湖廣總所近有申請以新舊官錢不同未敢通用正謂此也臣已行下諸監只以斬春監清熙七八九年錢樣爲準務令精好更不添兩數及四季翻樣欲乞更賜聖裁庶幾民聽不疑新舊一等何謂詳治司廢置之宜臣竊以臣僚初議專置鐵治一司是時私鑄熾盛鐵錢流入浙西內地駭愕專官講求誠合權道乃其方略禁姦摧遏鋒銳雖傷猛獸亦中事機今觀治司陳請三十餘事皆已施行矣然終是論建太廣行移束溼至使諸司乖戾州郡掣肘人心驚疑異論蜂起自有各路監司任責指揮人情少安方敢向前措置此臣所親見也事變之來動以靜勝不在張皇其後治司亦自畏縮雖已得旨者多不果用且如舒斬兩監鼓鑄之政舊責守臣其增造減工糙惡生弊走弄文牒支用自由當職官吏固宜黜罰爲治司者但當督察稽考總其大柄而已取而自鑄遂致怨咨以爲破壞兩州事起倉猝至於碎置幹官檢踏創造解宇營房列屬徒多控制州郡况鐵炭中賣處處增足非比銅坑苗脈須要尋求坐食端閑冗仗無用以臣所見私錢既蒙朝廷收換若民間照樣行使則官錢通流州郡嚴禁夾帶則私鑄止絕鑄造並遵舊法而新舊錢不疑稱提出於均平而江南北如一逐路自有監司任責則提點江淮湖北空令取會迂回更乞聖慈與宰執商量數月之間合與未合結局協於權制不爲贅疣塞希恩倖倖之門杜貪功紛亂之意靜治不擾准人自安臣謬蒙恩選委所有愚慮不敢不言干冒天威臣無任隕越俟命之至

蘄州到任謝表

始從參幕無最可書驟借專城以恩被錄對寵靈而甚願

誤寄委以知難中謝伏念臣頃隸太常承乏博士方壽皇
襲行舜禹之舊當陛下祇見祖宗之初頗預討論嘗叨奉
引何幸清明之上獲綴末班乃緣登悴之餘自求外補遠
役忽棲於故楚浮家幾遍於長川恭惟駕馭豪傑之時兼
有收挽孤寒之道遂令試郡課以治民江黃之間山澤相
雜素號僻左本極貧虛屬因淮南行鐵以來暨乎蘄口置
監而後陰仰官鑪之羨不勝僞冶之煩浸用驕奢無復繩
矩所以檢覈增鑄禁絕私錢畏兩文銷折之多市井至於
晝閉取十年工本之數軍庫爲之頓空解紛旣難任責良
重將欲布宣國家拊循之德奉行監司督察之威稍安人
情靈給經費懼非孱拙所克堪勝茲蓋伏遇皇帝陛下詳
於使臣察於知遠東擢疎賤卽爲守望之親磨厲鈍頑收
其敏達之効輯和邊面培壯本根臣敢不因時所宜以靜
爲福日計不足雖無毫髮之功心力未窮尙答乾坤之造

除淮西提舉謝表

素抱迂愚自投閑散責之禦守試事淺而未酬就俸按行
忝命優而難稱中謝伏以久令一使兼總三臺屬昔荒殘
在權宜而當省於今墾闢蓋吏道之滋繁重以鐵冶之司
旁制江湖之遠適幣泉淆雜之過幸朝廷收換之恩而錢
之官私尙難辨其眞僞鑄有新舊致徒分於愛憎人心交
疑物貨浸少茲爲大慮所貴周防譬之琴瑟旣解而更張
然膠柱之譏猶在如彼馬牛不安於乘服則駭輿之患當
思臣暫領蘄陽未彰善效弗諳淮土早動鄉情敢以章句
之諸生輒叨金穀之劇選此蓋恭遇皇帝陛下順時除弊
因事討論不惜厚費以解詿誤之窮愁不變本謀以消姦
非之階禍臣祇承德意遵用寬慈察部之條視身爲律倘

刑罰可損而事以底定則威靈所被而民用遙寧

除太府卿淮東總領謝表

既筦錢米又知甲兵本乞漫游更叨煩委中謝伏念序遷
學校固慚課業之荒唐內迫家門重困食用之寡薄一貧
殆不可忍屢請期於必從然而辭尊居卑陳力就列視古
爲訓於退則宜今乃升寄卿班示厥號名之寵預聞軍政
制其財賦之權猥用榮章被之弱質若夫此地爰自積年
務場壞而經常之鏹大虧綱運弊而淫惡之糧亦匱口累
日重者近憂而已兵民俱困則遠患若何况於由細入麤
以輕馭重忽當警急無異承平國其選擇而使能臣姑冒
昧而就祿此蓋恭遇皇帝陛下勤勞初載謹審外防謂臣
粗讀古書合更時務因其欲斂藏湖海之上且復令周旋
戎馬之間臣敢不事責經通身先損節必吝出納是爲有
司之常苟逃曠厥終返腐儒之舊

謝除華文閣待制提舉西京嵩山崇福宮表

昭示眷留未卽野人之賤寵還舊職復參近侍之榮姓名
已沒於朽陳命賜忽超於新特伏念臣資樸疎信已之學
乏進趣合變之能昨一內忝論思浸成違忤暨乎外專屏
扞又負憂虞迄無顯効於盛時固合冥心於暮齒若乃羸
扶短策緩駕卑車追憶悔尤濫軒裳之非據自嗟衰耄指
林壑以言歸惟賴天度并涵皇明隱燭獲從容而善退保
優佚之令終至於躑躅徃愆寂寥久廢因茲告請遂曲軫
於深慈悉與盪除俾再通於禁籍尙糜素廩仍躡真游爲
幸則然非願敢及此蓋恭遇皇帝陛下躬秉上德化幾泰
和馭臣以貴爲初美俗在寬之用哀憐末路蓋欲補其前
修矜恤老窮不忍失其故步竊仰鴻施有如神功臣身未

須而年徂志空存而力盡雖日愈重受恩之地然而莫知報國之方顛越是期就慚罔措

謝除寶謨閣直學士提舉鳳翔府上清太平宮表

帝典近而易遵皇居親而愈切超踰次對啟沃前旒顧慚衰邁之蹤難副知憐之厚宓以鑒觀治忽審擇後先大化所覃右文爲盛藏奎圖之府建自太宗直學士之官置從景德逮茲列聖竝煥鴻名分命諸儒遞升華序博達今古從容規諷之間先識幾微補報職業之外臣力耕朽壤勤鑿枯泉空有胥手胼足之勞曾無曝背食芹之獻忽進陪於閣職復嚴奉於仙靈淺陋則多潤色奚賴此蓋恭遇皇帝陛下同天造化與世範圍萬物覩聖而作新一毫皆上所成就存留宿舊閔惜餘殘非必選賢示將假寵臣敢不寅恭異數夕惕茂恩待滿今祠終儻晚歲乞身之願試尋末學少殫平生致主之忠

水心文集卷之二

去

湖南運判到任謝表

冒選擇於久閑之日厚矣曷酬拜恩除於尙病之時羸而難任陳情未察恭命勉行中謝伏念臣思過特深自量尤審一昨賜歸於窮舍卽甘息望於榮塗惟君父之矜憐不衰與朝廷之記錄常在甫頒祠稟遽錫州麾雖許控辭終蒙注意遂出重湖之節假以灌輸之權示欲必行嚴爲期會臣子供奔走之職何敢屢違穹蒼垂覆蓋之私所宜仰戴載馳裨暑綿涉修程旣達置司奉將隆指然念臣災屯合聚痾恙侵凌形質至於變移心慮從而昏奪累年沈痼衆藥備嘗曾微除愈之期僅有蘇醒之覺故人玩於存省或疑無他醫工莫知主名可謂異疾今有事任於一路不爲少非展布其四體無以堪若姑以疲憊臨之則何但鹵

莽而已更虞闕敗上累生成此蓋伏遇皇帝陛下法帝堯
之知人致文王之多士考於已試寧使勿欺採其舊聞責
以來效故令廢惰玷此光華臣敢不銷虛威以周下情立
實信以觀遠俗視殘軀之可力傾盡而爲儻宿疚之或平
靡捐以報

除祕閣修撰謝表

諗疾丐歸將待休於一壑疏恩寓職乃增重於三湘衆之
所榮臣以爲忝中謝竊以典修中祕肇自政和必須資歷
之多號稱館閣之舊屬厭時望積累外庸不虛論撰之名
始副掄除之實伏思臣者素謂畸人雖早汗於清班亦濫
塵於煩使施已深而未報福遽過以挺災坐閱寒涼再徂
歲閏及此扶行而問俗幾成尸素以具官惘惘於簿書之
程區區乎醫藥之事空抱膏盲之苦莫克砭磨迄何毫髮

水心文集卷之二

七

之勞可當褒序飾朽株以丹青之美登醜石於珪瓚之叢
凜然無堪躡是異數此蓋伏遇皇帝陛下至公衡聽兼愛
曲成憐其拙疎若在所取不緣孤外而有遐遣使之託身
文字之林掛名奎壁之次煥矣賁資燁其籠章臣末路幸
逢矢心銘激悵沈痾之縈薄未測頽齡恐綿力之支離弗
酬大造

除工部侍郎謝表

未散沈憂徒抱不天之恨迄緣終制冒參掌土之聯再竊
身榮永辜親養中謝伏念臣昨承君命而趨走遽懼家禍
之悲傷當其冥迷仍復顧省雖云順變驚日月之不留強
使復常恍形神之非昔記憐俯逮命召趨行賜先見於延
和歸舊班於起部沐浴膏澤之美殆異餘人生施枯槁之
恩有愈造物而臣摧殘故步損耗宿心豈無激昂之思滋

甚衰遲之迫，盜稱銖失，難課近功。一憶十忘，何裨末誼。但積徊徨之媿，莫知退避之方。此蓋伏遇皇帝陛下，龍德顯行，乾剛獨運。毖而求助，謙以圖終。拔臣寡特之中，冀銷迎附。察臣憂患之後，多自創懲。回視此生之幾，何常懼移。忠而靡及，滄溟善下。或堪涓勺之輸，穹昊蓋高尚。竭么微之告。

除吏部侍郎謝表

甫越兼旬，遽移冠部。畀之華劇，增以事權。中謝伏念，臣素弱而不能自強，無材而願出人下。乃欲安分，匪云執謙。胥疏退情之中，功名絕紀。蹇產病昏之後，意樂全銷。天許會逢，上命親近。從冬卿而陪獻，納考地貢而修虞衡。外耀恩榮，內藏拙守。於臣何所不足，愧臣無以仰承。今也超六聯之清，高司右列之銓。序効職既重，責成必深。用名已浮，計實安有耳。目睹記夙宵，隱憂此蓋。恭遇皇帝陛下，有拔士之至明，以好賢爲大德。馭下極稱，亭之審待。臣循理分之宜，位著所嚴。等威自辨，臣蕭然二簋不勝。禮樂之陳，眇矣一金。豈在範鎔之列，雖厲平凡之操。曷酬卓異之知。

除知建康到任謝表

內參從橐之華，外付帥垣之重。蓋人以爲寵，而臣之所憂中謝。伏以行宮蒙高宗臨御之頻，建鄴爲六朝都邑之舊。感時雖遠，撫事尙存。義執仇讐，安得不居。今而思古慮先，根本則豈容忘實。而徇名藩牆，初銳於掃除。堂奧遽煩於備警，江流回繞。遂將數里而屯，民力空殫。必也計丁而役，募市人至萬數。闔水艦且千餘，欲以歲年之規，責於旬月之近。自憐憂患，復苦病昏。忽被趣行，罔知攸措。此蓋伏遇皇帝陛下，文訓武克。天施地生，觀衣袂濡曳之爰所宜戒。

懼誦桑土綢繆之句尤在恩勤臣敢不怵惕以預防拊循而夙具視身衰謝已無欲速之心憑國威靈願附不爭之勝

代薛端明上遺表

臣聞不可移者有生之定數不能泯者將死之遺忠尚忍須臾願殫悃悞中謝伏念臣奮身孤遠逢世熙平孝宗聖德愈新超居諫職陛下大明始照擢忝從官荏苒歲年驅馳中外諭上指於帥漕未和之際宣國威於漢虜既隙之餘書殿陞華政途竊寵深慚非據不敢冒當迄荷隆慈許從晚退巖棲穴處未嘗不戴於堯天氣盡形銷無復再瞻於舜日入冥已迫戀闕空多伏望皇帝陛下法泰道之裁成體乾行之變化灼見物則不失義理之中審知治原常以仁恕爲本永膺大寶益邁昌圖

除華文閣待制提舉西京嵩山嵩福宮謝皇太子牋

於禮有稽宜併今祠而賜免以恩未聽反叨舊次而重居猥以凋殘蒙茲化育伏念某不能則止既老當休已積處於退閑更求全於晚末故官何在初無昨夢之尋陳迹都忘杳若歸雲之靜至迺興憐遐遠回念沈淪因再請之至誠煥一綸之新渥涇舟詠雅猶存飛躍之餘舜閣垂文復紀賡歌之盛稀闕喧於里社疑信雜於友朋血氣旣衰雖云在得日月其逝終將奚爲恭遇皇太子殿下惟德而譽時髦秉道而參國命內稟密訓備諸多士之長外穆周行靡失一夫之用以其昔忝班列之久不使驟從農圃之游某敢不勉竭頽年溫理幼學庖廩有繼莫酬素食之譏扈衛無功益媿榮名之忝

恭觀詔書元正日受玉寶者天運重來國寶再得感深昔
念喜甚今逢中謝恭以聖宋一道相承九有率俾琢瑀信
璽膺受隆圖西祀東封借曰著神休於炳炳繼志述事于
以見孝德之兢兢變或隱而難防理無往而不復竊何止
於陽虎獲迺自於蒙人憬彼遠夷慕仁風而願獻特因方
鎮轉誠意以上通兼陳樣冊之文益彰篆籀之實以至初
秦永昌之刻我家備物之珍殆無或遺靡不具在亶明德
而密護迄假手以回還皇帝陛下師古以治身奉先而繼
服何食息不存於祖業曾斯須敢怠於孫謀宜上穹之鑒
臨挈東州而歸附敬致邦符之舊光昭帝命之新羣辟會
同有司枚進江淮延頸望基本之常安關洛傾心想恩榮
之遍及

受玉寶賀牋

水心文集卷之二

三

副禕是御洪惟內治之彰明玉寶來歸信矣外戎之助順
慰滿民望契合天心中謝恭惟皇后殿下德靜而方仁潤
以澤綏黃赤以受璽文與帝同服濟濯以儉躬志先婦道
宜致家邦之慶聿觀符瑞之還喜協宸衷薦孚郊廟臣欣
逢盛典陪阻近班趙璧今回無復間行而衣褐魯寶再得
尙堪泚筆以書經

申省乞致仕狀

某伏自惟念初無藝能濫塵科目往備使令之偶乏猥超
涯分而已多效職蔑聞捫心內愧今既七十餘景不長素
有氣疾眩暈拘迫近尤畏寒澁縮慘懷咳嗽隨聲涕淚交
下倦憊屢月瘦悴羸殘視蔭將息固無久存之理伏乞矜
憐特賜敷奏許令致仕儻或垂逝之年猶保可全之節冀
以歌詠太平之樂仰酬君父難報之恩不勝感激俟命之

至

再申省狀

某伏準省劄奉聖旨不允者上恩隆而未許誠不計其歲
年下情迫以再干敢自違於經律伏念某少而怯懦長益
病昏方當壯盛之時已無血氣之勇論建常慚於迂闊事
功奚有於毫分况今老至而衰心意銷索目視耳聽皆瞶
眊之餘手拘足攣非奔走之具惟欲乞身暮景得謝明朝
麤希知足之風不爲學者之愧伏乞俯加矜惻特賜奏聞
許令就今年致仕漁樵故物復還山澤之臞耕鑿遺民永
被乾坤之造不勝銜荷激切俟命之至

